

四庫全書

集部

欽定四庫全書

集部

蔡中郎集卷三

四

詳校官監察御史_臣曹錫寶

檢討_臣何思鈞覆勘

總校官編修_臣王燕緒

校對官中書_臣牛稔文

謄錄監生_臣葉寶書

欽定四庫全書

蔡中郎集卷三

漢 蔡邕 撰

釋誨

閒居玩古不交當世感東方客難及揚雄班固崔駰之徒設疑以自通乃斟酌羣言題其是而矯其非作釋誨以戒厲云爾有祿世公子誨於華顛胡老曰蓋聞聖人之大寶曰位故以仁守位以財聚人然則有位斯貴有

財斯富行義達道士之司也故伊摯有負鼎之銜仲尼
設執鞭之言甯子有清商之歌百里有豢牛之事夫如
是則聖哲之通趣古人之明志也夫子生清穆之世稟
醇和之靈覃思典籍韞積六經安貧樂賤與世無營沉
精重淵抗志高冥包括無外綜析無形其已久矣曾不
能拔萃出羣揚芳飛文登天庭序彝倫掃六合之穢慝
清宇宙之埃塵連光茫於白日屬炎氣於景雲時逝歲
暮默而無聞小子惑焉是以有云方今聖上寬明輔弼

賢知崇英逸偉不墜於地德弘者建宰相而裂土才美者荷榮祿而蒙賜盍亦回塗改駕俛仰取容輯當世之利定不拔之功榮家宗於此時遺不滅之令蹤夫獨未之思邪何為守彼而不通此胡老傲然而笑曰若公子所謂覩曖昧之利而忘昭皙之害專必成之功而忽蹉跌之敗者也公子謾爾斂袂而興曰胡為其然也胡老曰居吾將釋汝昔自太極君臣始基有義皇之洪寧唐虞之至時三代之隆亦有緝熙五伯扶微勤而撫之於

斯已降天網縱人絃弛王塗壞太極施君臣土崩上下
瓦解於是智者騁詐辯者馳說武夫奮畧戰士講銳電
駭風馳霧散雲披變詐乖詭以合時宜或畫一策而綰
萬金或談崇朝而錫瑞珪連衡者六印磊落合縱者駢
組陸離隆貴翕習積富無涯據巧蹈機以忘其危夫華
離蒂而萎條去榦而枯女冶容而淫士背道而孤人毀
其滿神疾其邪利端始萌害漸亦芽簌簌方轂天天是
加欲豐其屋乃蔀其家是故天地否閉聖哲潛形石門

守晨沮溺耦耕顏歎抱璞蘧瑗保生齊人歸樂孔子斯
征雍渠騃乘逝而遺輕夫豈傲生而背國乎道不可以
傾也且我聞之曰南至則黃鍾應融風動而魚上冰麤
賓統而微陰萌兼葭蒼而白露凝寒暑相推陰陽代興
運極則化理亂相承今大漢紹陶唐之洪烈盪四海之
殘灾隆隱天之高建絙地之基皇道惟融帝猷丕顯泯
泯庶類含甘吮滋檢六合之羣品躋之乎雍熙羣僚恭
己於職司聖主垂拱乎兩楹君臣穆穆守之以平濟濟

多士端委縉珽鴻漸盈階振鷺充庭譬猶鍾山之玉泗濱之石累珪璧不為之盈採浮磬不為之索曩者洪源闢而四隩集武功定而干戈戢獵狁攘而吉甫宴城濮捷而晉凱入故當其有事也則蓑笠並載擐甲揚鋒不給於務當其無事也則舒紳緩佩鳴玉以步綽有餘裕夫世臣門子誓御之族天隆其祐主豐其祿抱膺從容爵位自從攝須理髯餘官委賁其進取也順傾轉圓不足以喻其便逡巡放屣不足以況其易夫夫有逸羣之

才人人有優贍之智童子不問疑於老成矇矓不稽謀
於先生心恬澹於守高意無為於持盈燦乎煌煌莫非
華榮明哲泊焉不失所寧狂淫振蕩乃亂其情貪夫狗
財夸者死權瞻仰此事體躁心煩闇謙盈之效迷損益
之數騁駑駘於修路慕騏驎而增驅卑俯乎外戚之門
乞助乎近貴之譽榮顯未副從而顛踣下獲胥靡之辜
高受滅家之誅前車已覆襲軌而驚曾不鑒禍以知畏
懼予誰悼哉害其若是天高地厚跼而踣之怨豈在明

患生不思戰戰兢兢必慎厥尤且用之則行聖訓也舍之則藏至順也九河盈溢非一山所防帶甲百萬非一勇所抗今子責匹夫以清宇宙寧可以水旱而累堯湯乎懼煙炎之燬燔何光芒之敢揚哉且夫地將震而樞星直井無景而日陰食元首寬則望舒朏侯王肅則月側匿是以君子推微達著尋端見緒履霜知冰踐露知暑時行則行時止則止消息盈冲取諸天紀利用遭泰可與處否樂天知命持神任己羣車方奔乎險路安能

與之齊軌思危難而自豫故在賤而不恥方將騁馳乎
典籍之崇塗休息乎仁義之淵藪盤旋乎周孔之庭宇
揖儒墨而與為友舒之足以光四表收之則莫能知其
所有若乃丁千載之運應神靈之符闔閭闔乘天衢擁
皇蓋奉皇樞納玄策於聖德宣太平於中區計合謀從
已之圖也勲績不立予之辜也龜鳳山翳霧露不除踴
躍草萊祇見其愚不我知者將謂之迂脩業思真棄此
焉如靜以俟命不數不渝百歲之後歸乎其居幸其獲

稱天所誘也罕漫而已非已咎也昔伯翳綜聲於鳥語
葛盧辨音於鳴牛董父受氏於豢龍奚仲供德於衡軸
偃氏興政於巧工造父登御於驂騑非子享土於善圍
狼臆取右於禽囚弓父畢精於筋角欽飛明勇於赴流
壽王創基於格五東方要幸於談優上官効力於執蓋
弘羊據相於運籌僕不能叅跡於若人故抱璞而優游
於是公子俯首降階忸怩而避胡老乃揚衡含笑援琴
而歌歌曰練予心兮浸太清滌穢濁兮存正靈和液暢

兮神氣寧情志泊兮心亭亭嗜欲息兮無由生踳宇宙
而遺俗兮眇翩翩而獨征

明堂月令論

明堂者天子太廟所以崇禮其祖以配上帝者也夏后
氏曰世室殷人曰重屋周人曰明堂東曰青陽南曰明
堂西曰總章北曰玄堂中央曰太室易曰離也者明也
南方之卦也聖人南面而聽天下嚮明而治人君之位
莫正於此焉故雖有五名而主以明堂也其正中皆曰

太廟謹承天順時之令昭令德宗祀之禮明前功百辟之勞起養老敬長之義顯教幼誨穉之學朝諸侯選造士於其中以明制度生者乘其能而至死者論其功而祭故為大教之宮而四學具焉官司備焉譬如北辰居其所而衆星拱之萬象翼之政教之所由生變化之所由來明一統也故言明堂事之大義之深也取其宗祀之貌則曰清廟取其正室之貌則曰太廟取其尊崇則曰太室取其堂則曰明堂取其四門之學則曰大學取

其四面周水圓如璧則曰辟廱異名而同事其實一也
春秋因魯取宗之奸賂則顯之太廟以明聖王建清廟
明堂之義經曰取部大鼎於宋戊申納於太廟傳曰非
禮也君人者將昭德塞違故昭令德以示子孫是以清
廟茅屋昭其儉也夫德儉而有度升降有數文物以紀
之聲明以發之以臨昭百官百官於是乎戒懼而不敢
易紀律所以明大教也以周清廟論之魯太廟皆明堂
也魯禘祀周公於太廟明堂猶周宗祀文王於清廟明

堂也禮記檀弓曰王齊禘於清廟明堂也孝經曰宗祀文王於明堂禮記明堂位曰太廟天子曰明堂又曰成王幼弱周公踐天子位以治天下朝諸侯於明堂制禮作樂頒度量而天下大服成王以周公有大勲勞於天下命魯公世世禘祀周公於太廟以天子之禮升歌清廟下管象舞所以異魯於天下也取周清廟之歌歌於魯太廟明魯之太廟猶周之清廟也皆所以昭文王周公之德以示子孫也易傳太初篇曰天子旦入東學晝

入南學暮入西學太學在中央天子之所自學也禮記
保傳篇曰帝入東學上親而貴仁入西學上賢而貴德
入南學上齒而貴信入北學上貴而尊爵入太學承師
而問道與易傳同魏文侯孝經傳曰太學者中學明堂
之位也禮記古大明堂之禮也膳夫是相禮日中出南
闈見九侯反問於相日側出西闈視五國之事日出入
北闈視帝節猷爾雅曰宮中之門謂之闈王居明堂之
禮又別陰陽門東南稱門西北稱闈故周官有門闈之

學師氏教以三德守王門保氏教以六藝守王闡然則師氏居東門南門保氏居西門北門也知掌教國子與易傳保傳王居明堂之禮參相發明為學四焉文王世子篇曰凡大合樂則遂養老天子至乃命有司行事興秩節祭先師先聖焉始之養也適東序釋奠於先老遂設三老五更之位言教學始之於養老由東方歲始也又春夏學干戈秋冬學羽籥皆習於東序凡祭與養老乞言合語之禮皆小樂正詔之於東序又曰大司成論

說在東序然則詔學皆在東序東序東之堂也學者聚
焉故稱詔太學仲夏之月令祀百辟卿士之有德於民
者禮記太學志曰禮士大夫學於聖人善人祭於明堂
其無位者祭於太學禮記昭穆篇曰祀先賢於西學所
以教諸侯之德也即所以顯行國禮之處也太學明堂
之東序也皆在明堂辟廱之內月令記曰明堂者所以
明天氣統萬物明堂上通於天象日辰故有十二宮象
日辰也水環四周言王者動作法天地德廣及四海方

此水也禮記盛德篇曰明堂九室以茅蓋屋上圓下方
此水名曰辟廱王制曰天子出征執有罪反釋奠於學
以訊馘告樂記曰武王伐殷薦俘馘於京太室詩魯頌
云矯矯虎臣在泮獻馘京鎬京也太室辟廱之中明堂
太室也與諸侯泮宮俱獻馘焉即王制所謂以訊馘告
者也禮記曰祀乎明堂所以教諸侯之孝也孝經曰孝
悌之至通於神明光於四海無所不通詩曰自西自東
自南自北無思不服言行孝者則曰明堂行悌者則曰

太學故孝經合以為一義而稱鎬京之詩以明之凡此
皆明堂太室辟廡太學事通文合之義也其制度數各
有所法堂方百四十四尺坤之策也屋圜屋徑二百一
十六尺乾之策也太廟明堂方三十六丈通天屋徑九
丈陰陽九六之變也圜蓋方載六九之道也八闥以象
八卦九室以象九州十二宮以應辰三十六戶七十二
牖以四戶九牖乘九室之數也戶皆外設而不閉示天
下不藏也通天屋高八十一尺黃鍾九九之實也二十

八柱列於四方亦七宿之象也堂高三尺以應三統四鄉五色者象其行外廣二十四丈應一歲二十四氣四周以水象四海王者之大禮也月令篇名曰因天時制人事天子發號施令祀神受職每月異禮故謂之月令所以順陰陽奉四時効氣物行王政也成法具備各從時月藏之明堂所以示承祖考神明明不敢泄瀆之義故以明堂冠月令自天地定位有其象聖帝明君世有紹襲蓋以裁成大業非一代之事也易正月之卦曰泰

其經曰主用享於帝吉孟春令曰乃擇元日祈穀於上帝顓頊歷衡曰天元正月己巳朔日立春日月俱起於泰建宮室制度月令孟春之月日在營室堯典曰乃命羲和欽若昊天歷象日月星辰敬授人時月令曰乃命太史守典奉法司天日月星辰之行易曰不利為寇利用禦寇月令曰兵戎不起不可從我始書曰歲二月同律度量衡中春令曰日夜分則同度量鈞衡石凡此皆合於大厯唐政其類不可盡稱戴禮夏小正傳曰陰陽生物

之後王事之次則夏之月令也殷人無文及周而備文
義所說傳衍深遠宜周公之所著也宮號職司與周官
合周書七十二篇而月令第五十三古者諸侯朝正於
天子受月令以歸而藏諸廟中天子藏之於明堂每月
告朔朝廟出而行之周室既衰諸侯怠於禮魯文公廢
告朔而朝仲尼譏之經曰閏月不告朔猶朝於廟刺舍
大禮而徇小儀也自是告朔遂闕而徒用其羊子貢非
廢其令而請去之仲尼曰賜也爾愛其羊我愛其禮廢

明王復興君人者昭而明之稽而用之耳無逆聽令無
逆政所以臻乎大順陰陽和年穀豐太平洽符瑞由此
而至矣秦相呂不韋著書取月令為紀號淮南王安亦
以取為第四篇政改名曰時則故偏見之徒或云月令
呂不韋作或云淮南皆非也

月令問答

問者曰子何為著月令說也予幼讀記以為月令體大
經同不宜與記書雜錄並行而記家記之又畧及前儒

特為章句者皆用其意傳非其本旨又不知月令徵驗
布在諸經周官左傳實與禮記通他議橫生紛紛久矣
光和元年余被謗章罹重罪徙朔方內有獫狁敵衝之
釁外有寇虜鋒鏑之艱危險凜凜死亡無日過被學者
聞家就而考之亦自有所覺悟庶幾頗得事情而訖未
有注記著於文字也懼顛蹶隕墜無以示後同於朽腐
竊誠思之書有陰陽升降天文厯數事物制度可假以
為本敦辭託說審求厯象其要者莫大於月令故遂於

憂怖之中晝夜密勿昧死成之旁貫五註參互羣書至
及國家律令制度遂定律數盡天地三光之情辭繁多
而蔓衍非所謂理約而達也道長日短危殆兢惕取其
心盡而已故不能復加刪省蓋所以探賾辨物庶幾多
識前言徃行之流苟便學者以為可覽則余死而不朽
也

問者曰子說月令多類周官左傳假無周官左傳月令
為無說乎曰夫根柢植則枝葉必相從也月令與周官

並為時王政令之記異文而同體官名百職皆周官解
月令甲子沈子所謂似春秋也若夫太昊蓐收勾芒祝
融之屬左傳造義立說生名者同是以用之

問者曰既用古文於歷數乃不用三統用四分何也曰
月令所用參諸歷象非一家之事傳之於世不曉學者
宜以當時所施行且密近者三統已疎濶廢弛故不用
也

問者曰既不用三統以驚蟄為孟春春中雨水為二月

節皆三統法也獨用之何曰孟春月令曰蟄蟲始震在正月也中春始雨水則雨水二月也以其合故用之

問者曰歷云暑季夏節也而今文見於五月何也曰今不以歷節言據時始暑而記也歷於大雪小雪大寒小寒皆去十五日然則小暑當去大暑十五日不得及四十五日不以節言據時暑也

問者曰中春令不用犧牲以圭璧更皮幣不犧牲何也曰是月獻羔以太牢祀高禘宗廟之祭以中月安得用

犧牲祈者求之祭也著令者豫設水旱疫癘當禱祈用
犧牲者是用之助生養傳祈以幣代牲章因於高禘之
事乃造說曰更者刻木牲如廟有祧更此說自欺極矣
經典傳記無刻木代牲之說蓋書有轉誤三豕渡河之
類也

問者曰中冬令曰奄尹申宮令謹門閭令曰門闢何也
曰闢尹者內官也主宮室出入宮中宮中之門曰闢闢
尹之職也閭里門非闢尹所主知當作闢也

問者曰今日七駟咸駕今日六駟何也曰本官職者莫正於周官周官天子馬六種種別有駟故知六駟左傳晉程鄭為乘馬御六駟屬焉無言七者知當為六也

問者曰今於中秋築城郭於經傳為非其時詩曰定之方中作於楚宮定營室也九月十月之交西南方中故傳曰水昏正而栽築即營室也昏正者昏中也栽築者栽木而始築也今文在前一月不合於經傳也

問者曰子說三難皆以日行為本古論周官禮記說以

為但逐惡而已獨安所取之曰取之於月令而已四時
通等而夏無難文由日行也春行少陰秋行少陽冬行
太陰陰陽悖使不於其類故冬春難以助陽秋難以達
陰至夏節太陽行太陰自得其類無所扶助獨不難取
之於是也

問者曰反令每行一時轉三旬以應行三月政也春行
夏令則雨水不時謂孟夏也草木早枯中夏也國乃有
恐季夏也今總合為一事不分別施之於三月何也曰

說者見其三旬不得專注而為之說有所滯礙不得通矣孟秋反令行冬令則草木枯後乃大水敗其城郭即分為三事後乃大水在枯後也城郭為獨自壞非水所為也季冬令曰行春令則胎夭多傷民多蠱疾命之曰逆即分為三事行季冬令為不感災異但命之曰逆也知不得斷絕分應一月也其類皆如此令之所述畧舉其尤者也

問春食麥羊夏食菽雞秋食麻犬冬食黍豕之屬但以

為時味之宜不合於五行月令服食器械之制皆順五行者也說所食獨不以五行不已畧乎曰蓋亦思之矣凡十二辰之禽五時所食者必家人所畜丑牛未羊戌犬酉雞亥豕而已其餘龍虎以下非食也春木王木勝土土王四季四季之禽牛屬季夏犬屬季秋故未羊可以為春食也夏火王火勝金故酉雞可以為夏食也季夏土王土勝水當食豕而食牛土五行之尊者牛五畜之大者四行之牲無足以配土德者故以牛為季夏食

也秋金王金勝木寅虎非可食者犬豕而無角虎屬也
故以犬為秋食也冬水王水勝火當食馬而禮不以馬
為牲故以其類而食豕也然則麥為水菽為金麻為火
黍為水各配其牲為食也雖有此說而米鹽細碎不合
於易卦所為之禽及洪範傳五事之畜近似卜筮之術
故予畧之不以為章句聊以應問見有說而已

問記曰三老五更子獨曰五叟周禮曰八十一御妻令
曰御妾何也曰字誤也叟長老之稱其字與更相似書

者轉誤遂以為更嫂字女旁叟字從叟今皆以為更矣
立字法者不以形聲何得以為字以嫂叟推之知是更
為叟也妻者齊也惟一適人稱妻其餘皆妾位最在下
是以不得言妻云也

正交論

聞之前訓曰君子以朋友講習而正人無有淫朋是以
古之交者其義敦以正其誓信以固逮夫周德始衰頌
聲既寢伐木有鳥鳴之刺谷風有棄予之怨自此以降

彌以凌遲或闕其始終或強與比周是以縉紳患其然而論者諄諄如也疾淺薄而懷携貳者有之惡朋黨而絕交游者有之其論交也曰富貴則人爭趨之貧賤則人爭去之是以君子慎人所以交已審己所以交人富貴則無暴集之客貧賤則無棄舊之賓矣原其所以來則知其所以去見其所以始則觀其所以終彼貞士者貧賤不待夫富貴富貴不驕乎貧賤故可貴也蓋朋友之道有義則合無義則離善則久要不忘平生之言惡

則忠告善誨之否則止無自辱焉故君子不為可棄之行不患人之遺已也信有可歸之德不病人之遠已也不幸或然則躬自厚而薄責於人怨其遠矣求諸已而不求諸人咎其稀矣夫遠怨稀咎之機咸在乎躬莫之致也子夏之門人問交於子張而二子各有聞乎夫子然則以交誨也商也寬故告之以拒人師也褊故訓之以容衆人從其行而矯之至於仲尼之正教則泛愛衆而親仁故非善不喜非仁不親交游以方會友以文可

無貶也穀梁赤曰心志既通名譽不聞友之罪也令將
患其流而塞其源病其末而刈其本無乃未若擇其正
而黜其邪與與其彼農皆黍而獨稷焉夫黍亦神農之
嘉穀與稷並為菜盛也使交可廢則黍其愆矣括二論
而言之則刺薄者博而洽斷交者貞而孤孤有羔羊之
節與其不獲已而矯時也走將從夫孤焉

薦邊文禮

明將軍以申甫之德當中興之隆建上將之任膺秉國

之權妖寇作孽震驚京師運籌帷幄定策屆勝先擒馬
元歸近之變天兵致誅充豫以清冀荆用次雲消席捲
克厭衆心王室以寧萬國兆民莫不賴祉伏惟幕府初
開博選清英華髮舊德並為元龜成功立事莫不畢舉
雖振鷺之集西廡濟濟之在周庭無以或加伏見陳留
邊讓字文禮天授逸才聰明賢知纂成伐柯不遠之則
韶齟夙孤不墜家訓始任學問便就大業閒不遊嬉初
覽諸經見本知義尋端極緒受者不能答其問章句不

能逮其意詩書易理先通大義業以次舉衆傳篇章無
術不綜心通性達剖纖入冥口辨辭長而節之以禮度
安祥審固守持內定非禮勿動非法不言據狐疑之論
定嫌審之分經典交至檢括參合衆夫嘉焉莫之能奪
使讓生於先代在唐虞則元凱之比當仲尼則顏冉之
亞豈徒世俗之凡偶兼混是非講論而已哉才藝言行
卓逸不羣階級名位亦宜超然不以常制為限長幼為
拘若復輩從此郡選舉非所以彰瓌璋之高價昭大知

之絕明也傳曰函牛之鼎以烹雞多汁則淡而不可食少汁則焦而不可熟大器之於小用固有所不宜也邕誠竊悵悵怪此寶鼎未受犧牛大羹之和久佐煎熬臠載之間願明將軍回謀守慮思垂米納就讓疾病所觀察之更以屬缺招延表貢行狀列於王府躋之宗伯納之機密展其力用副其器量夫若以年齒為嫌則顏淵不得冠德行之首子奇不得紀治阿之功苟能其事古今一也密䟽特表及期而行邦國其昌邕寢疾羸匍匐

拜寄不敢須通

祖德頌

昔文王始受命武王定禍亂至於成王太平乃洽祥瑞
畢降夫豈后德熙隆漸浸之所通也是以易嘉積善有
餘慶詩稱子孫保之非特王道然也賢人君子修仁履
德者亦其有焉昔我烈祖暨於予考世載孝友重以明
德率禮莫違是以靈祇降之休瑞兎擾馴以昭其仁木
連理以象其義斯乃祖禰之遺靈盛德之所貺也豈我

童蒙孤稚所克任哉乃為頌曰穆穆我祖世篤其仁其德克明惟懿惟醇宣慈惠和無競伊人巖巖我考益之以莊增崇丕顯克構其堂是用祚之休徵惟光厥徵伊何於昭於今園有甘棠別榦同心墳有擾兔宅我栢林神不可誣偽不可加析薪之業畏不克荷矧貪靈貺以為已華惟予小子豈不是欲於有先功匪榮伊辱

朱公叔謚議

漢益州刺史南陽朱公叔卒門人陳季珪等議所謚云

宜曰忠文子陳留蔡邕議曰昔在聖人之制諡也將以
勸善彰惡俾民興行賢愚臧否依事從實雖文武之美
幽厲之穢罔不具存自王公以降至於列國大夫皆用
配號傳於無窮秦以世代諡而黜其事漢興以來惟天
子與五等之爵然後有之公卿大臣其禮闕焉歷世彌
久莫之或修益州府君貫綜典術率由舊章始與諸儒
考禮定議加陳留府君以益州之諡是後覽之者亦無
聞焉今子亶纂襲前業不忘遺則孝既至矣禮實宜之

謹覽陳生之議思忠文之意參之羣典籍之謚法夫萬
類莫貴乎人百行莫貴乎忠故夏后氏正以人統教以
忠德然則忠也者人德之至也而猶有三焉孔子曰進
思盡忠又曰臣事君以忠奉上之忠也曰為人謀而不
忠乎又曰忠焉能勿誨乎謀誨之忠也春秋左傳曰小
大之獄必以情情忠之屬也又曰上思利人曰忠撫下
之忠也三者人之則而忠行乎其中益州府君自始事
至沒身忠言不輟乎口忠謀不已乎心其在帝室正身

危行言如砥矢策合神明謇謇之諫文章具存奉上忠
矣其在部臣匡救善導出自一心疑不我聽者果有躋
覆不測之禍謀誨忠矣爰牧冀州時值凶荒勞心苦思
勤恤度事誅斃貪暴糾戢貴黨雖則強禦當官能行夫
豈淫刑將有利也發墓盜柩議而不罪夫豈漏姦察以
情也撫下忠矣位在牧伯職據納言秉權食祿實有年
數而居無蓄好財貨不益舊糲食布衾綦謂之精麗者
昔魯季孫行父卒宰庀家器無衣帛之妾無食粟之馬

君子曰相三君矣而無私積可不謂忠乎而謚曰文子春秋外傳曰忠文之實也然則文忠之彰也忠以為實文以彰之事通議合兩名一致是忠貞儉之稱文也邾子蘧蒢卜遷於繹史曰利於民不利於君公曰民苟利矣孤亦與焉於是遷而遂卒謚曰文公是危身利民之稱文也衛大夫孔圉謚曰文子子貢疑焉惟敏而好學不恥下問仲尼與之是勤學好問之稱文也府君所在屢以忤違貼以深患苟除民害死生之前後三黜一

罹疾廢於身危矣兼包六典命世作師猶復宗事趙叟
示有攸尊能下問矣有一於此猶可以稱況乃忠兼三
義文備三德於古志不悖而諡法亦曰宜矣本議曰忠
文子按古之以子配諡者魯之季文子孟懿子衛之孫
文子公叔文子皆諸侯之臣也至於王室之卿大夫其
尊與諸侯並故以公配春秋曰劉卷卒塋劉文公公羊
傳曰劉卷者何天子大夫也經又曰王子虎卒左傳曰
王叔文公卒而如同盟禮也此皆天子大夫得稱其禮

與同盟諸侯敵體故也又禮緣臣子咸欲尊其君父故雖侯伯子男之臣自稱其君咸得曰公及其卒也異國之人稱之皆然是以邾子許男公以葬春秋之正議也以例言之則府君王室亞卿也有王叔劉氏之比以臣子之辭言之則有邾許稱公之文雖無土而其位是也今曰公猶可若稱子則降等多矣懼禮廢日久將詭時聽周有仲山甫伯陽嘉父優老之稱也宋有正考父魯有尼父配諡之稱也父雖非爵號與同體天子諸侯咸

用優賢異亡順乎門人臣子所稱之宜可以公父之中
擇一處焉使不得稱子而已

樽銘

酒以成禮弗愆以淫德將無醉過則荒沈盈而不冲古
人所箴尚鑒茲器懋勗厥心

警枕銘

應龍蟠蟄潛德保靈制器象物示有其形哲人降鑒居
安聞傾

蔡中郎集卷三

欽定四庫全書

蔡中郎集卷四

漢 蔡邕 撰

述行賦

延熹二年秋霖雨逾月是時梁冀新誅而徐璜左悺五
侯擅貴於其處又起顯明苑於城西人徒凍餓不得其
命者甚衆白馬令李雲以直言死鴻臚陳君以救雲抵
罪璜以余能鼓琴自朝廷勅陳留郡守遣余到偃師病

不前得歸心憤此事遂託所過述而成賦余有行於京
洛兮遭淫雨之經時塗迤邐其蹇連兮潦汙滯而為災
馬桀蹠而不進兮心鬱悵而憤思聊弘慮以存古兮宣
幽情而屬詞久余宿於大梁兮誚無忌之稱神哀晉鄙
之無辜兮忿朱亥之篡軍歷中年之舊城兮憎佛肸之
不臣問甯越之裔胄兮藐髣髴而無聞經圃田而瞰北
境兮晤衛康之封疆迄管邑而憎感歎兮愠叔氏之啓
商過漢祖之所隘兮弔紀信於滎陽降虎牢之曲陰兮

路丘墟以盤縈勤諸侯之遠戍兮侈申子之美城稔濤
塗之懷惡兮陷夫人以大名登長坂以凌高兮陟葱山
之蹇峭建撫體而立洪高兮經萬世而不傾迴峭峻以
降阻兮小阜寥其異形岡岑紆以連屬兮谿谷夏其香
冥迫嵯峨以乖邪兮廓巖壑以崢嶸攢械樸而雜榛枯
兮被浣濯而羅布疊炎萁與臺菌兮緣層崖而結莖行
遊日以南望兮覽太室之威靈顧太河於北垠兮瞰洛
汭之始并追劉定之攸儀兮美伯禹之所營悼太康之

失位兮愍五子之歌聲尋修軌以增舉兮邈悠悠之未
央山風汨以颺漏兮氣慄慄而厲涼雲鬱術而四塞兮
雨濛濛而漸唐僕夫疲而劬瘁兮我馬虺頽以玄黃格
莽丘而稅駕兮陰曠曠而不陽哀衰周之多故兮眺瀕
隈而增感忿子帶之淫逸兮唁襄王於壇坎悲寵嬖之
為梗兮心惻愴而懷慄乘舫舟而沂湍流兮浮清波以
橫厲想宓妃之靈光兮神幽隱以潛翳實熊耳之泉液
兮揔伊瀍與澗瀨通渠源於京城兮引職貢乎荒裔操

吳榜其萬艘兮充王府而納最濟西溪而容與兮息鞏
都而後逝愍簡公之失師兮疾子朝之為害玄雲黯以
凝結兮集零雨之淅淅路阻敗而無軌兮塗渾溺而難
遵率陵阿以登降兮赴偃師而釋勤壯田橫之奉首兮
義二士之俠憤佇淹留以候霽兮感憂心之殷殷并日
夜而遙思兮宵不寐以極晨候風雲之體勢兮天牢湍
而無文彌信宿而後闕兮思逶迤以東運見陽光之顥
顥兮懷少弭而有欣命僕夫其就駕兮吾將往乎京邑

皇家赫而天居兮萬方徂而並集貴寵扇以彌熾兮僉
守利而不戢前車覆而未遠兮後乘驅而競入窮變巧
於臺榭兮民露處而寢濕清嘉穀於禽獸兮下糠粃而
無粒弘寬裕於便辟兮糾忠諫其駸急懷伊呂而黜逐
兮道無因而獲入唐虞眇其既遠兮常俗生於積習周
道鞠為茂草兮哀正路之日湮觀風化之得失兮猶紛
攘其多違無亮采以匡世兮亦何為乎此畿甘衡門以
寧神兮詠都人而思歸爰結蹤而迴軌兮復邦族以自

綏亂曰跋涉遐路艱以阻兮終其永懷窘陰雨兮歷觀
羣都尋前緒兮考之舊聞厥事舉兮登高斯賦義有取
兮則善戒惡豈云苟兮翩翩獨征無儔與兮言旋言復
我心胥兮

短人賦

侏儒短人僬僥之後出自外域戎狄別種去俗歸義慕
化企踵遂在中國形貌有部名之侏儒生則象父惟有
晏子在齊辯勇匡景拒崔加双不恐其餘阉么劣厥儻

寔嘖嘖怒語與人相拒矇昧嗜酒喜索罰舉醉則揚聲
罵詈恣口衆人患忌難與並侶是以陳賦引譬比偶皆
得形象誠如所語其詞曰雄荆鷄兮鶩鷺鵲鳩鵲兮
鶉鷃鷓鴣冠帶勝兮啄木兒觀短人兮形若斯熟地蝗兮
蘆即且蠶中蛹兮蠶蠕須視短人兮形若斯木門閭兮
梁上柱敝鑿頭兮斷柯斧鞞鞞鼓兮補履撲脫椎柄兮
擣衣杵視短人兮形如許

漢津賦

夫何大川之浩浩兮洪流森以玄清配名位乎天漢披
厚土而載形登源自乎嶓冢引漾澧而東征納陽谷之
所吐兮兼漢沔之殊名揔眈澮之羣液兮演西土之陰
精遇萬山以左迴兮旋襄陽而南縈切大別之東山兮
與江湘乎通靈嘉清源之體勢兮澹澹潏以安流鱗甲
育其萬類兮蛟龍集以嬉遊明珠胎於靈蚌兮夜光潛
乎玄洲雜神寶其充盈兮豈魚龜之足收於是遊目騁
觀南援三州北集京都上控隴坻下接江湖導財運貨

懋遷有無既乃風颭蕭瑟勃焉並興陽侯沛以奔驚洪
濤涌而沸騰願乘流以上下窮滄浪乎三溟覲朝宗之
形兆瞰洞庭之交會

協和婚賦

惟性情之至好歡莫偉乎夫婦受精靈之造化固神明
之所使事深微以玄妙實人倫之肇始考邃初之原本
覽陰陽之綱紀乾坤和其剛柔良兌感其晦腓葛覃恐
其失時標梅求其庶士惟休和之盛代男女得乎年齒

婚姻協而莫違播欣欣之繁祉良辰既至婚禮已舉二
族崇飾威儀有序嘉賓僚黨祁祁雲聚車服照路駟騑
如舉既臻門屏結軌下車阿傳御堅鴈行蹉跎麗女盛
飾睚如春華

筆賦

惟其翰之所生於季冬之狡兔性情亟以慄悍體遙迅
以騁步削文竹以為管加漆絲之纏束形調搏以直端
染玄墨以定色畫乾坤之陰陽讚宓皇之洪勲叙五常

之休德揚蕩蕩之明文紀三王之功伐兮表八百之肆
覲博六經而綴百氏兮建皇極而序彝倫綜人事於晝
昧兮贊幽冥於神明象類多喻靡施不協上剛下柔乾
坤位也新故代謝四時次也圓和正直規矩極也玄首
黃管天地色也

琴賦

歷松岑而將降睹鴻梧於幽阻高百仞而不枉對修條
而特處蹈通崖而往遊圖茲梧之所宜信雅琴之麗樸

乃弁伐其孫枝命離婁使布繩施公輸之剗剗遂雕琢
而成器揆神農之初制盡聲變之奧妙抒心志之鬱滯

彈琴賦

一本作頌

清聲發兮五音舉韻宮商兮動徵羽曲引興兮繁絲撫
然後哀聲既發秘弄乃開左手抑揚右手徘徊抵掌反
覆抑按藏摧於是繁絃既抑雅韻乃揚仲尼思歸鹿鳴
三章梁甫悲吟周公越裳青雀西飛別鶴東翔飲馬長
城楚曲明光走獸率舞飛鳥下翔感激絃歌一低一昂

彈碁賦

榮華灼爍萼不韡韡於是列象雕華逞麗豐腹斂邊中
隱四企輕利調博易使馳騁然後我製兵綦夸驚或風
飄波動若飛若浮不遲不疾如行如留放一敵六功無
與儔

胡栗賦

樹遐方之嘉木兮於靈宇之前庭通二門以征行兮夾
階除而列生彌霜雪而不彫兮當春夏而滋榮因本心

以誕節兮凝育孽之綠英形猗猗以艷茂兮似翠玉之
清明何根莖之豐美兮將蕃熾以悠長適禍賊之災人
兮嗟天折以摧傷

篆勢

字畫之始因於鳥跡蒼頡循聖作則制文體有六篆巧
妙入神或象龜文或比龍鱗紆體放尾長趯短身頡若
黍稷之垂穎蘊若蟲蛇之棼緼揚波振擊龍躍鳥震延
頸脅翼勢欲凌雲或輕舉內投微本濃末若絕若連似

水露緣絲凝垂下端從者如懸衡者如編杪者邪趣不
方不圓若行若飛歧歧翺翺遠而望之若鴻鵠羣遊絡
繹遷延迫而視之湍際不可得見指揮不可勝原研桑
不能數其結屈離婁不能睹其隙間般倭揖讓而辭巧
籀誦拱手而韜翰處篇籍之首目燦燦彬彬其可觀搗
華豔於紈素為學藝之範圍嘉文德之弘懿蘊作者之
莫刊思字體之俯仰舉大畧而論旃

隸勢

鳥跡之變乃惟佐隸蠲彼繁文崇此簡易厥用既行體
象有度負若星陣鬱若雲布其大徑尋細不容髮隨事
從宜靡有常制或穹窿恢廓或櫛比鍼列或砥繩平直
或蜿蜒繆戾或長邪角趣或規旋矩折修短相副異體
同勢奮華輕舉離而不絕纖波濃點錯落其間若鍾虡
設張庭燎飛烟嶄嵒崔嵯高下屬連似崇臺重宇層雲
冠山遠而望之若飛龍在天近而察之心亂目眩奇姿
譎誕不可勝原研桑所不能計宰賜所不能言何草篆

之足算而斯文之未宣豈體大之難睹將秘奧之不傳
聊佇思而詳觀舉大畧而論施

飲馬長城窟行


青青河邊草
絲絲思遠道
遠道不可思
宿昔夢見之
夢見在我旁
忽覺在他鄉
他鄉各異縣
展轉不可見
枯桑知天風
海水知天寒
入門各自媚
誰肯相為言
客從遠方來
遺我雙鯉魚
呼童烹鯉魚
中有尺素書
書長跪讀素書
書中竟何如
上有加飡食
下有長相憶

答元式詩

嗟余有行爰戾茲邦先道博學同類率從濟濟羣彥如
雲如龍君子博文貽我德音辭之輯矣穆如清風

翠鳥詩

庭陬有若榴綠葉含丹榮翠鳥時來集振翼修形容迴
顧生碧色動搖揚縹青幸脫虞人機得親君子庭馴心
托君素雌雄保百齡



蔡中郎集卷四

欽定四庫全書

集部

蔡中郎集卷五

詳校官監察御史臣曹錫寶

檢討臣何思鈞覆勘

總校官編修臣王燕緒

校對官中書臣牛稔文

謄錄監生臣葉寶書

欽定四庫全書

蔡中郎集卷五

陳太丘碑

漢 蔡邕 撰

先生諱實字仲弓潁川許昌人也含元精之和應期運
之數兼資九德總修百行於鄉黨則恂恂焉斌斌焉善
誘善導仁而愛人使夫少長咸安懷之其為道也用行
舍藏進退可度不徼許以干時不遷怒以臨下四為郡

功曹五辟豫州六辟三府再辟大將軍宰聞喜半歲太
丘一年德務中庸教敦不肅政以禮成化行有謚會遭
黨事禁錮二十年樂天知命澹然自逸交不諂上愛不
黷下見幾而作不俟終日及文書赦宥時年已七十遂
隱丘山懸車告老四門備禮閒心靜居大將軍何公司
徒表公前後招辟使人曉諭云欲特表便可入踐常伯
超補三事佩紆金紫光國垂勲先生曰絕望已久歸巾
待期而已皆遂不至弘農楊公東海陳公每在衮職羣

僚賀之皆舉手曰潁川陳君命世絕倫大位未躋慙於
文仲竊位之負故時人高其德重於公相之位也年八
十有三中平三年八月丙子適疾而終臨沒顧命留葬
所卒時服素棺槨財周視喪事惟約用過乎儉羣公百
僚莫不咨嗟巖藪知名失聲揮涕大將軍弔祠錫以嘉
諡曰徵士陳君稟岳瀆之精苞靈曜之純天不慙遺一
老俾屏我王梁崩哲萎於時靡憲縉紳儒林論德謀績
諡曰文範先生傳曰郁郁乎文哉書曰洪範九疇彝倫

攸叙文為德表範為士則存誨沒號不亦宜乎三公遣
令史祭以中牢刺史敬弔太守南陽曹府君命官作諫
曰赫矣陳君命世是生含光醇德為士作程資始既正
守終又令奉禮而沒休矣清聲遺官屬掾吏前後赴會
刊石作銘府丞與比縣會葬荀慈明韓元長等五百餘
人總麻設位哀以送之遠近會葬千人以上河南尹种
府君臨郡追歎功德述錄高行以為遠近鮮能及之重
部大掾以成斯銘可謂存榮沒哀死而不朽者也乃作

銘曰我我崇岳吐符降神於皇先生抱寶懷珍如何昊
穹既喪斯文微言圯絕來者曷聞交交黃鳥爰集於棘
命不可贖哀有何極

陳太丘廟碑銘

維中平五年春三月癸未豫州刺史典以褒功述德政
之大經是以作謚封墓興於周禮衛鼎晉銘其昭有實
故太丘長潁川許昌陳實字仲弓含聖哲之清和盡人
才之上美光明配於日月廣大資乎天地辟四府宰三

城神化著於民物形表圖於丹青巍巍乎其不可尚也
洋洋乎其不可測也儉約違時懸車致仕徵辟交至遂
不屑就春秋八十有三寢疾而終大將軍賜諡羣后建
碑國人立廟先生有二子季方元方皆命世希有繼期
特立季方盛年早亡亦圖容加謚元方在喪毀瘁消形
嘔血純孝過哀率禮不越於時嘉異畫像郡國欽盛德
之休明懿鍾鼎之碩義乃樹碑鐫石垂世寵光詞曰於
皇先王冠耀八荒闡德之宇探道之綱繼期立表以訓

四方惟亮天工羣生之望高明允實有馥其芳載德奕
世休有烈光欽慕在人舊有憲章過牧斯州庶奉清塵
棄予而邁靡瞻靡聞嗟我懷矣曷所咨詢告哀金石式
昭其勤

丈範先生陳仲弓銘

君諱實字仲弓潁川許人也其先出於有虞氏中葉當
周之盛德有媯滿者武王配以大姬而封諸太昊之墟
是為陳胡公春秋之末失其爵土遂以國氏焉世篤懿

德令聞丕顯君膺皇靈之清和受明哲之上姿憑先民
之遐迹秉玄妙之淑行投足而襲其軌施舍而合其量
夫其仁愛溫柔足以孕育羣生廣大寬裕足以包覆無
方剛毅強固足以威暴矯邪正身體化足以陶冶世人
先生有四德者故言斯可象靜斯可效是以邦之子弟
遐方後生莫不同情瞻仰由其模範從其趣尚戾很斯
和爭訟化讓雖嚴威猛政迫以刑戮未若先生潛導之
速也其立朝事上也恭順貞厲含章直方無顯諫以彰

直不割高而引長常幹州郡腹心之任義則進之以達
道否則退之以光操然後德立名宣蓋於當世辟司徒
府納規陳謀匡弼三事人用昭明台階允寧遷聞喜長
清風暢於所漸儉節溢於監司郡政有錯爭之不從即
解綬去復辟太尉府遷太丘長民之治情斂慾反於端
懿者猶草木之偃於翔風百卉之挺於春陽也以所執
不協所屬色斯舉矣不俟終日辟大將軍府道之行廢
有分於命乃罹密網以就禁錮潛伏不試十有八年大

忌蠲除舉賢良方正大將軍司徒並辟君曰七十有懸
車之禮況我過諸遂不應其命容止法度老而彌壯凡
所履行事類博審不可勝數畧舉首目其實錄記在乎
其傳春秋八十有三中平三年八月丙子卒大將軍三
公使御屬徃弔祠會塋作誄謚曰文範先生刺史太守
樹碑頌德許令以下至於國人立廟舊邑四時烝嘗歡
哀承祀其如祖禰先生存獲重稱亡歆血食修行於已
得斯於人固上世之所罕有前哲之所不過也孤嗣紀

銜恤在疚敢錄言行終始所守乃有三友生咨度禮
則咸曰君化道神速行於有國法施於民祀典所宗鄉
人之祠非此遺孤所得專也昔者先生甚樂茲土築室
講誨精靈所寧紀順奉雅意遂定兆域宜有銘勒表墳
墓俾後生之歌詠德音者知丘封之存斯也乃作銘曰
於熙文考天授弘造淵玄其深巍峩其高剛而無虐柔
而不撓誕鋪模憲示世作教君之誨矣民胥效矣道行
斯進發乃斯止鮮我顯泰旣多幽否舍榮取辱涅而不

金
卷五
緇德之休明賤不為恥超邈其猷莫與方軌

郭有道林宗碑

先生名泰字林宗太原界休人也其先出自有周王季之穆有號叔者實有懿德文王咨焉建國命氏或謂之郭即其後也先生誕膺天衷聰睿明哲孝友溫恭仁篤柔惠夫其器量弘深姿度廣大浩浩焉汪汪焉與夫不可測已若乃砥節礪行直道正辭貞固足以幹事隱括足以矯時遂考覽六籍探綜圖緯周流華夏游集帝學

收文武之將墜拯微言之未絕於時纓綏之徒紳佩之士望形表而景附聆嘉聲而響和者猶百川之歸巨海鱗介之宗龜龍也時乃潛隱衡門收朋勤誨童蒙賴焉用祛其蔽州郡聞德虛已備禮莫之能致羣公休之遂辟司徒掾又舉有道皆以疾辭將蹈洪崖之遐迹紹巢由之絕軌翔區外以舒翼超天衢之高時稟命不融享年四十有三以建寧二年正月乙亥卒凡我四方同好之人永懷哀悼靡所置念乃相與推先生之德以圖不朽

之事僉以為先民既沒而德音猶存者亦賴之於紀述也今其如何而闕斯禮於是建碑表墓昭銘景行俾芳烈奮乎百世令聞顯於無窮其詞曰於休先生明德通玄純懿淑靈受之自天崇壯幽濬如山如淵禮樂是悅詩書是敦匪惟摭華乃尋厥根宮牆重仞允得其門懿乎其純確乎其操洋洋搢紳言觀其高樓遲泌丘善誘能教赫赫三事幾行其招委辭召貢保此清妙降年不能民斯悲悼爰勒茲銘摛其光耀嗟爾來世是則是效

光武濟陽宮碑

惟漢再受命曰世祖光武皇帝考南頓君初為濟陽令
濟陽有武帝行過宮常封閉帝將生考以令舍下濕開
宮後殿居之建平元年十二月甲子夜帝生時有赤光
室中皆明使卜者王長卜之長曰此善事不可言歲有
嘉禾一莖生九穗長於凡禾因為尊諱王室中微哀平
短祚姦臣王莽偷有神器十有八年罪成惡熟天人致
誅帝乃龍見白水淵躍昆上破前隊之衆彌二公之師

收兵畧地經營河朔戮力戎功翼戴更始又不即命帝位闕焉於是羣公諸將據河洛之文叶符瑞之珍僉曰歷數在帝踐祚允宜乃以建武元年六月乙未即位鄴縣之陽九域之陌祀漢配天不失舊物享國三十有六年方內乂安蠻夷率服巡狩太山禪梁父皇代之遐迹帝者之上儀罔不畢舉道德餘慶延於無窮先民有言樂樂其所自生而禮不忘其本是以虞稱媯汭姬美周原皇天乃眷神宮實始於此厥跡邈哉所謂神麗顯融

越不可尚小臣河南尹鞏瑋先祖銀艾封侯歷世卿尹
受漢厚恩瑋以商箕餘烈郡舉孝廉為大官丞來任濟
陽願見神宮追惟桑梓褒實之義用敢作頌頌曰赫矣
炎光爰耀其輝篤生聖皇二漢之微稽度乾則誕育靈
資黃孽作慝篡握天機帝赫斯怒爰整其師應期潛發
扶陽而飛禍亂克定羣凶殄夷匡復帝載萬國以熙
於四岳展義省方登封降禪升於中皇爰茲初基天命
孔彰子子孫孫保之無疆

太尉橋公廟碑

橋氏之先出自黃帝帝塋於橋山子孫咸以為氏漢興
世以禮樂為業高祖諱仁位至大鴻臚列名於儒林祖
侍中廣川相考東萊太守公稟性貞純幼有弘姿剛而
不虐威而不猛聞仁必行睹義斯居文以典術守以繼
固弱冠從政當官而行刺史周公辟舉從事所部二千
石受取有驗公糾發賊罪致之於理時有椒房桂戚之
託周公累息公不為之動史魚之勁直山甫之不阿於

是始形舉孝廉除郎中洛陽左尉特進潁王梁不疑為
河南尹當事以對是時畏其權寵而為屈辱者多矣公
不折節解印綬去辟司徒舉高第補侍御史以詔書考
司隸校尉趙祁事廷尉郭貞私與公書非接使御命之
儀公封書以聞貞以文章得用鬼薪公離司寇辟大將
軍梁公幕府屢以救正於其隆指將軍嘉之無言不讎
又以高第補侍御史在職旬月羌戎匪茹震驚隴漢西
府舉公拜涼州刺史威名克宣凶虜革心清風席捲至

則無事車師後部阿羅多卑君相與爭國兵作亂公遣
從事牛稱何傳舉輕騎奉辭責罪收阿羅多卑君繫燉
煌正處以聞阿羅多為王卑君侯稱以奉使副指除侯
部不動干戈揮鞭而定西域之事人以為美談又值饑
荒諸郡饑餒公開倉廩以貸救其命主者以舊典宜先
請公曰若先請民已死廩訖乃上之詔報曰邊穀不得
妄出玄擅出於是玄有汲黯憂民之心後不以為常公
達於事情剖斷不疑皆此類也遷齊相視民如保赤子

討惡若赴水火刑明賞遂民知勸懼臨淄令賂財賊多
罪止正受鞠就刑沒齒無怨竟以不先請免官徵拜上
谷太守民有父子俱行凶人人惡言當道曉之不止其
子殺之而捕得公以其見悔辨直不舉文書以遇赦令
蕃縣有帝舜廟以故事齊祠戶曹史張機有懲罰貨祠
巫言託以舜命約公云不得譴公覺其奸態收考首伏
即日伏辜遷漢陽太守上邽令皇甫禎賊罪明審收考
髡鉗死於冀市後以病去徵拜議郎司徒長史循王惺

桓帝同產以懷逆謀黜封瘳陶王以公長於襟帶拜鉅鹿太守惺畏怖明憲檢於靜息自將作大匠徵未到而章榜先入故轉拜議郎遂用免官徵度遼將軍遷河南尹少府大鴻臚司徒司空託病而去悉引衆災雖非已負公皆以自劾遜位歲餘拜尚書令時河間相蓋升以朝廷在藩國時鄰近舊恩歷河南太守太中大夫在郡受取數億以上創毒深刻公表升會放狼籍不顧天網損辱國家為上招怨當肆市朝以謝兆民幸遇贖令罪

除惡在可免升官禁錮終身沒入財賂非法之物以充
帑藏懲戒羣下連表上不納而升遷為侍中公稱病辭
徙拜光祿大夫復拜太尉如前遜位復拜少府病不就
職拜太中大夫凡所獲祿皆公府所特表選臨難受位
自九列之後乃以丕貶公紀綱張弛勇決不回見是非
而作連於察機巧燕居從容申申天天和樂寬裕愛士
親仁凡見公容貌聞公聲音莫不熙怡悅懌思樂模則
來者忘歸去者願還雅性謙克不吝於利雖欲衆子羣

孫並在仕次曾無順媚一言之求身沒之日無獲大位在百里者莫得好縣比方公孫未有若茲者也初公為舍於舊里弟卒推與其孤至於卒世柩殯無所清儉仁與之效於斯為著巍巍乎若德允世之表儀也已公諱玄字公祖少辟孝廉辟司徒大將軍府為侍御史牧一州典五郡出將邊營入掌機密歷三卿同三司享年七十五光緒七年夏五月甲寅以太中大夫薨於京師朝廷所以弔贈如前傳之儀九月乙酉塋於某所三孤故

臣門人相與述公言行咨度禮制文德銘於三鼎武功
勒於鉦鉞官簿次第事之實錄書於碑陰俾爾昆裔永
有仰於碑陰云光烈考伊漢元公克明克哲實叡實
聰如淵之浚如岳之崇威壯號虎文繁雕龍撫柔疆垂戎
狄率從敷教中夏五典咸通帝謂我后朕嘉君功命君
三事時亮天工公拜稽首輔翼惟恭左右天子祇厥勲庸
庶績既熙黎民時雍上下謐寧八方和同不顯伊德作
憲萬邦

太尉橋公碑頌

公諱玄字公祖梁國睢陽人也大鴻臚之曾孫廣州相之孫東萊太守之元子也膺受純性誕有特表岐嶷而超等總角而逸羣至於初紳高明卓異為衆傑雄其性疾華尚樸有折而不撓臨大節而不可奪之風經藝傳記周覽博涉瑰奇在前靡所不識當世是以服重器歸高明州郡交請待以訪斷歷端首則義可行處瓜牙而威以布察孝廉除郎中洛陽左尉以公事去辟司徒舉

高第侍御史直道而往用免其任辟大將軍西府表拜
涼州刺史遷齊相以公事去詔書印綬即家拜上谷太
守遷漢陽太守徵拜議郎司徒長史鉅鹿太守被詔書
為將作大匠為受罰者所章拜議郎即徵拜度遼將軍
遷河南尹少府大鴻臚遂陟司空司徒託病遜回起家
拜尚書令以疾篤稱拜光祿大夫後拜太尉久病自替
復為少府太中大夫春秋七十五光和七年五月甲寅
薨公性質直不憚強禦在憲臺則有盡規之忠領州郡

則有虎豹之威其拔賢如旋流討惡如霆擊每所臨向
清風先翔遠近豫震茲可謂超越衆庶彰於遠邇者已
於是故吏司徒博陵崔烈廷尉河南吳整等以為至德
在已揚之由人苟不皦述夫何考焉乃共勒嘉石永昭
芳烈遂作頌曰赫矣橋父秉文握武內為宗幹出為藩
輔在憲彈枉竟由厥矩允牧於涼刈彼裔土爰將度道
亦用齊斧敷教四畿旋統京宇敦茲五服衆庶是與膺
踐七命翼我哲聖登空補袞陟徒訓敬尹尉清宸熙帝

之政終始為貞典章以定遺愛在民皇哀其命立石刊
銘莫遁斯聽覓而有靈萬億其盛

東鼎銘

維建寧三年秋八月丁丑延公於玉堂前廷乃詔曰其
以大鴻臚橋玄為司空再拜稽首以讓帝曰俞往三讓
然後受命公乃虔恭夙夜帝采勤施八方旁作穆穆以
對揚天子丕顯休命越在先民眎於天子罔不著其股
肱畢其思心式率天行式昭德音公亦克紹厥猷鑒於

法罔敢不法憲於誠罔敢不誠用總是羣后保乂室家
勛在方策民咸曰休哉惟帝念功越若來二月丁丑遷
於司徒

中鼎銘

維建寧四年三月丁丑延公登於玉堂前廷乃制詔曰
其以司空橋玄為司徒公拜稽首以讓帝曰俞往三讓
然後受命公允迪厥德宣力肆勤戰戰兢兢以役帝事
率夫百辟媚於天子天子曰都慎厥身修思永同寅協

恭以和天衷德則昭之違則塞之回乃不敢不弼枉乃不敢不匡股肱之事既克三事之由允備灾肯作見乃引其責曰凡庶徵不若曩倫不叙是惟臣之職祇以疾告表越十月庚午記此

西鼎銘

維光和元年冬十二月丁巳延公入崇德殿前乃制詔曰其以光祿大夫玄為太尉公拜稽首曰臣聞之三讓莫或克從臣不敢辭臣犬馬齒七十可以生可以死其

戮力開私悉心在公以盡為臣之節於時侍從陞階與
聞公之昌言者莫不惕厲如履薄冰既乃碑表百代

黃鉞銘

孝桓之季年鮮卑入塞盜起匈奴左部梁州叛羌逼迫
兵誅淫衍東夷高句麗翮子百固逆謀並發三垂騷然
為國憂念西府表橋公昔在涼州柔遠能邇不煩軍師
而車師克定及在上谷漢陽連在營郡膂力方剛明集
士衆徵拜度遼將軍始受旄鉞鉦鼓之任扞禦三垂公

以吏士頻年在外勤於奔命人馬疲羸撓鈍請且息州
營橫發之役以補困憊朝廷許之於是儲廩豐饒奉使
不懸人逸馬畜弓勁矢利而經用省息官有餘資執事
無放散之尤簿書有進入之羸治兵示威戎士踊躍旌
旗耀日金鼓霆奮守有山岳之固攻有必克之勢羌戎
授首於西疆百固冰散於塞上鮮卑賓服烽燧不舉眎
事三年馬不帶鐵弓不出韞乃以吉金作茲鉦鉞軍鼓
陳之東階以昭公文武之盛烈銘曰帝命將軍秉茲黃

卷五
錢威靈振耀如火之烈公之在位羣狄斯柔齊斧罔設
人士斯休

漢太尉楊公碑

公諱賜字伯獻弘農華陰人姬姓之國有楊侯者公其
後也其在漢室赤泉侯佐高丞相翼宣咸以盛德光於
前朝祖司徒考太尉繼跡宰司咸有勛烈公承家崇軌
受天醇素欽承奉構閑於伐柯烈風雖變不易其趣文
藝典籍尋道入與操清行朗潛晦幽閒不荅州郡之命

辟大將軍府不得已而應之遷陳倉令公乃因是行退
居廬公車特徵以病辭司空舉高第拜侍中越騎校尉
帝篤先業將問故訓公以羣公之舉進授尚書於禁中
遷少府光祿勳敬揆百事莫不時序庶尹知恤閭闔推
清列作司空地平天成陰陽不忒公遂身避託疾告退
又以光祿大夫受命司徒敬敷五品宣洽人倫燮和化
理股肱耳目之任靡不克明及至太尉四時順動三光
耀潤羣生豐遂太和交薄三公六卿五蹈三堦受爵開

國應位特進非盛德休功假於天人孰能該備寵榮兼
包令錫如公之至者乎公體資明哲長於知見凡所辟
選升諸帝朝者莫非瑰才逸秀并叅儲佐惟我下流二
三小臣穢損清風愧於前人乃糾合同僚各以所審紀公
勲蹟刊石立銘以慰永懷銘曰天降純嘏篤生柔嘉俾
胤祖考光輔國家三葉在服帝載用和粵暨我公尤執
丕貞在棟伊隆於鼎斯寧德被宇宙華夏以清受茲介
福履祚孔成為邑河渭袞冕紱珽以佐天子祇事三靈

不顯伊德萬邦作程爰銘爰贊式昭懿聲

文烈侯楊公碑

公諱賜字伯獻兼通五典周覽篇籍以為尚書帝王之
要政有國之大本也是以三葉相承研其精義五代之
微言王政之約綱罔不尋其端源究其條貫凜乎其見
聖人之情旨也蓋以蹈騰餘縱思高游夏初潛山澤授
誨童冠後生賴以發袪蒙蔽文其材素者不可勝數乃
由宰府遂作帝臣於時聖幼將入學羣公以溫故知新

德宜師保乃以越騎校尉陟於先生之列帝坐已北面以納大誨其教人善誘則恂恂焉罔不伸也引情致喻則闇闇焉罔不釋也迄用有成緝熙光明惟帝念功六在九卿三事勛假皇天澤充區域疆土建封申增戶邑人臣之極位兼而有之然處豐益約九命滋恭可謂高朗令終有始有卒者已於是門生大將軍何進等瞻仰洙泗公喪之禮糾合朋徒稽諸典制僉以為匡弼之功政事之實詔策之文則史臣志其詳若夫道術之美授

之方策則是門人二三小子所特貫綜敢竭不才謏錄
所審言於碑乃申頌曰巍巍聖猷匪師不昭士子困蒙
匪師不教於皇文父邈哉伊超如玉之固如岳之喬鑽
之斯堅仰之彌高示我顯德授我無隱正席傳道承帝
之問誨茲一人萬邦作順微微我徒實賴遺訓文武作
式元勛既奮光啟爵土垂統末胤存榮亾哀沒而不泯

司空文烈侯楊公碑

曰漢有國師司空文烈侯楊公公維司徒之孫太尉公

之胥子皇祖考以懿德胥及肆勤式建休勲起洪範公
祇服弘業克丕堂構小乃不敢不慎大亦不敢不戒用
罔有擇言失行在於其躬洎在辟舉先志載言罔不攸
該乃自宰臣以從王事立功不有用辭其祿逮作御史
允執國憲納於侍中在帝左右爰董武事王師孔閑羣
公以舊德碩儒道通術明宜建師保延入華光侍宴路
寢敷典誥之精旨達聖王之聰叡帝以機密齊栗常伯
劇任鮮克知臧以釐其采命公再作少府俾率其屬以

熙庶績天地作險國家丕承軍門祛禁式遏寇虐命公
再作光祿亦總其熊羆之士不貳心之臣保乂帝家嵩
嵩大理惟制民命命公作民尉惟刑之恤旁施四方惟
明折獄蔽罪於憲之中亦惟三禮六樂國之元幹命公
作太常明德惟馨八音克諧神人以和永世豐年溥天
率土而衆莫外命公作司空公惟戢之翊明其政時惟
休哉惟天陰騭下民彝倫所由順序命公作司徒而敬
敷五教以親百姓父義母慈兄友弟恭子孝時惟休哉

昭孝於辟雍命公作三老帝躬以祇敬遵有虞於上庠
茫茫大運垂光烈曜命公作太尉璇璣運周七精循軌
時惟休哉帝欲宣力於四方公則翼之辟道或違公則
弼之虔恭夙夜不敢荒寧用對揚天子丕顯休命天子
大簡其勲用授爵賜封侯於臨晉功成化洽景命有傾
帝乃震慟執書以泣命於左中郎將郭儀作策賜公驃
騎將軍臨晉侯印綬兼號特進諡以文烈寵命畢備
而後即世肆其孤彫敢儀古式昭銘景烈銘曰天鑒有

漢誕生元輔世作三事勛在王府乃及伊公克光前矩
悉心畢力脩其祖武化洽羣心澤漫綿宇帝曰文烈朕
嘉君功為邑河渭建茲土封申備九錫以祚其庸位此
特進於異羣公昔在申呂匡佐周宣崧高作頌大雅揚
言今我文烈帝載用熙參光日月比功四時身歿名存
永世慕思

太傅文恭侯胡公碑

公諱廣字伯始交趾都尉之元子也公應天淑靈履性

貞固九德咸修百行畢備遭家不造童而夙孤上奉繼
親下慈弱弟崎嶇險約之中以盡孝友之道及至入學
從訓歷觀古今生而知之聞一睹十兼以周覽六經博
總羣議旁貫憲法通識國典年二十七察孝廉除郎中
尚書侍郎尚書左丞尚書僕射幹練機事綢繆樞極忠
亮惟允簡於帝心智畧周密冠於庶事遷濟陰太守其
為政也寬裕足以容衆和柔足以安物剛毅足以威暴
體仁足以勸俗故禁不用刑勸不用賞其下望之如日

月從之如影響思不可忘度不可革遺愛結於人心超
無窮而垂則徵拜大司農遂作司農遷太尉以援立之
功封安樂鄉侯錄尚書事稱疾屢辭策賜就第復拜司
空功成身退俾位特進又拜太尉復以特進致命休神
又拜太尉遜位歸爵旋於舊土徵拜太中大夫尚書令
太僕太常司徒永康之初以定策元功復封前邑錄尚
書事疾病就第又授太傳入參機衡五蹈九列七統三
事諒闇之際三據冢宰和神人於宗伯理水土於下台

訓五品於司徒耀三辰於上階光弼六世歷載三十自漢興以來鼎臣元輔耄艾老成勲被萬世與祿終始未有若公者焉春秋八十二建寧五年三月壬戌薨於位天子悼惜羣后傷懷詔五官中郎將任崇奉冊贈以太傅安樂鄉侯印綬拜室家子一人郎中賜東園秘器賜絲帛含歛之備中謁者董詡弔祠護喪錢布賻賜率禮有加賜諡曰文恭昭顯行迹四月丁酉塋於洛陽塋故吏濟陰池喜感公之義率慕黃鳥之哀推尋雅意彷徨

舊土休績丕烈宜宣於此乃樹石作頌用揚德音詞曰
於皇上德懿鑠孔純大孝昭備思順履信膺期命世保
茲舊門淵泉休茂彪炳其文爰贊天機翼翼惟恭夙夜
出納紹跡虞龍賦政於外神化玄通普被汝南越用熙
雍帝曰休哉命公三事乃耀柔嘉式是百司股肱元首
庶績咸治二氣燮雍五徵來備勲格皇天澤洽后土封
建南藩受茲介祐玉藻在冕毳服艾輔輅車雕駟四牡
修扈贊事上帝祇祀宗祖陟降盈虧與時消息旣明且

哲保身遺則同軌旦奭光充區域生榮死哀流統罔極

太傅胡公碑

維漢二十有一世建寧五年春三月既生魄八日壬戌
太傅安樂鄉侯胡公薨越若來四月辛酉塋我君文恭
侯於是掾太原王允鴈門畢整屬扶風曾宙潁州殷歷
等僉謂公之德也柔而不犯威而不猛文而不華實而
不朴靜而不滯動而不躁總天地之中和覽生民之上
操聰明膚敏兼質先覺涉觀憲法契濶文學睹臯陶之

聞閭探孔子之房奧然而約之以禮守之以恭寬之以
納衆汎愛多容其誘人也恂恂焉怡怡焉能使蒙惑開
析偽戾優順逸情勤信及其創基發跡機密聖朝其知
其能夙夜惟寅以允帝命是以頻繁機極三升而不出
焉乃還談其舊章彌綸古訓貫萬品研精微用補前臣
之所闕十年而無愆強記同乎富平周慎過於博士偶
山甫乎喉舌匹虞龍而納言惟帝命公以二郡其為政
也導人以德帥物以已敦以忠肅勵以知恥人悅其化

夫樂其和士相勉於公朝民勸行於私家徽纆縈而靡
係鞭朴棄而無加洋洋乎若德宣治嚴以為威寬以為
福而已哉五作卿士七蹈相位太僕司農太傅司空各
一司徒特進各二太常太尉各三光輔六世歷載三十
有餘其致治也通水泉於潤下蓄后土於稼穡訓五品
於羣黎叅人物於區域耀三辰於渾元協大中於皇極
傳聖德於幼冲率旦奭於舊職譬彼四時功成則退在
盈思中升隆以順建封邑於南土踐殊號於特進榮祚

統業垂乎來胤公自二郡及登相位凡所辟用遂至大
位者故司徒中山祝括其餘登堂閣據賦政策勲樹功
流化者蓋不可勝載惟我末臣頑蔽無聞仰慕羣賢惡
乎可及自公寢疾至於薨斃叅與嘗禱列在喪位雖庶
物戮力不愆於禮進睹墳塋几筵靈設退顧堂廡音儀
永闕感悼傷懷心肝若割相與累次德行撰舉功勲刊
之於碑用慰哀思其詞曰煥文德伊朝后應期運作漢
輔喜中興膏民庶澤洪渟亶攸序亘地區充天宇麟高

遠踵遐武揚景烈垂不朽仰邃古耀昆後

胡公碑銘

公諱廣字伯始南郡華容人也其先自媯姓建國南土
曰胡子春秋書焉列於諸侯公其後也考以德行純懿
官至交趾都尉公寬裕仁愛覆載博大研道知幾窮理
盡性凡聖哲之遺教文武之末墜罔有不綜年二十七
察孝廉除郎中尚書侍郎左丞尚書僕射內正機衡允
釐其職文敏暢乎庶事密靜周乎樞機帝用嘉之遷濟

陰太守公乃布愷悌宣柔嘉通神化導靈和揚惠風以
養真激清流以盪邪取忠肅於不言消奸宄於爪牙是
以君子勤禮小人知恥鞠推息於官曹刑戮廢於朝市
餘貨委於路衢餘種棲於畎畝遷汝南太守增修前業
考績既明入作司農實掌金穀之淵藪和均闕石王府
以充遂作司徒昭敷五教進作太尉宣暢渾元人倫輯
睦日月重光遭國不造帝祚無主援立孝桓以紹宗緒
用首謀定策封安樂鄉侯戶邑之數加於羣公入錄機

事聽納總已致位就第復拜司空敷土導川俾順其性
功遂身退告疾固辭乃為特進爰以休息又拜太常典
司三禮敬恭禋祀神明嘉歆永世豐年聿懷多福復拜
太尉尋申前業又以特進逍遙致位又拜太常邁疾不
夷遜位歸爵遷於舊都徵拜太中大夫延和末年聖主
革止倖臣誅斃引公為尚書命以二千石居官委以閭
外之事釐改度量以新國家弘綱既整袞闕以補乃拜
太僕車正馬閑六駟習馴遷太常司徒質帝晏駕推建

聖祠復封故邑與叅機密寢疾告退復拜太傅錄尚書
事於時春秋高矣繼親在堂朝夕定省不違子道旁無
几杖言不稱老居喪致哀率禮不越其接下答賓雖幼
賤降等禮從謙厚尊而彌恭勞思萬機身勤心苦雖老
萊子嬰兒其服方叔克壯其猷公且勤於吐握正考父
俯而循禮曷以尚茲夫烝烝至孝德本也體和履忠行
極也博聞周覽上通也勤勞王家茂功也用能十登三
事篤受介祉亮皇業於六工嘉丕績於九有窮生人之

光寵享黃耆之遐紀蹈明德以保身與福祿乎終始年
八十有二建寧五年春壬戌薨於位天子悼痛贈策賜
諡諡曰文恭如前傳之儀而有加焉禮也故吏司徒許
詡等相與欽慕崧高蒸民之作取言時計功之則論集
行跡銘諸琬琰其詞曰伊漢元輔時惟文恭聰明叡哲
思心瘁容畢力天機帝休其庸賦政於外有邈其蹤追
作卿士粵登上公百揆時序五典克從萬邦黎獻共惟
時雍勲烈既建爵土乃封七被三事再作特進弘惟幼

冲作傳以訓赫赫猗公邦家之鎮澤被華夏遺愛不倫
日與月與齊光並運存榮亡顯沒而不泯

胡太傅祠前銘

天鑒有漢山岳降靈於肅文恭應期誕生好是懿德柔
惠且貞爰在初服皇嘉其聲納於機密機密惟清守於
三邦三邦事寧越尹三卿百揆時序七受帝命作此元
輔左右六世靖綏土宇蠢彼羣生保賴亶叙紹跡龍夷
繼軌山甫遭國不造仍世短祚援立聖嗣得公之謨帝

卷五
曰文恭朕嘉君功為邑安樂以祐其庸登位特進於異
羣公休命丕顯光寵克彰公拜稽首是對是揚藹藹惟
公民斯攸望春秋既暮倏爾乃喪不慙是遺俾屏於皇
新廟奕奕於以烝嘗子子孫孫承嗣無疆

胡廣黃瓊頌

巖巖山岳配天作輔降神有周生申及甫允茲漢室誕
育二后曰胡曰黃方軌齊武惟道之淵惟德之藪股肱
元首代作心膂天生蒸民有則有類我胡我黃鍾厥純

懿巍巍特進仍踐其位赫赫三事七佩其綬奕奕四牡
沃若六轡袞職龍章其文有蔚參曜乾台窮寵極貴功
加八荒羣生以遂超哉邈乎莫與為二

司空楊公碑

公諱秉字叔節弘農華陰人其先蓋周武王之穆晉唐
叔之後也未葉以支子食邑於楊因氏焉周室既微裔
胄無緒暨漢興烈祖楊喜佐命征代封赤泉侯嗣子業
綏冕相繼公之不考以忠憲亮弼輔孝安登司徒太尉

公承夙緒世篤儒教以歐陽尚書京氏易誨受四方學者自遠而至蓋踰三千初辟司空舉高第授侍御史遷豫州兗州刺史任城相徵入勸講拜太中大夫左中郎將尚書出補右扶風留拜光祿大夫遭權嬖貴盛六年守靜外戚火燔乃遷太僕太卿公事絀位浹辰之間俾位河南憤疾豪強見邁姦黨用嬰疾廢起家復拜太常遂陟三司沙汰虛冗料簡貞實抽援表達與之同蘭芳任鼎重從駕南巡為朝碩德然知權過於寵私富侔國

大臣苛察望變復還條表以聞啓導上怒其時所免州
牧郡守五十餘人饗戾是黜英才是列善否有章京夏
清肅在位七載年七十有四延熹八年五月丙戌薨朝
廷惜焉寵賜有加公自奉嚴勅重遵禮度量材授任當
官而行不為義絀疾是苛政益固其守厨無宿肉器不
鏤雕夙喪嬪儷妾不嬖御可謂立身無過之地正直清
儉該備者矣昔仲尼嘗垂三戒而公免焉故能匡朝盡
直獻可去奸忠侔前後聲塞宇宙非黃中純白窮達一

致其惡能立功立事敷聞於下昭升於上若茲巍巍者
乎於是門人學徒相與刊石樹碑表勒鴻勳讚懿德傳
億年於戲公惟岳靈天挺德翼至神氣綢繆仁哲生應
台任作邦楨帝欽亮訪典刑道不惑迄有成光遐邇穆
其清

司空臨晉侯楊公碑


皇帝遣中謁者陳遂侍御史馬助持節送柩陳遵桓典
蘭臺令史十人將羽林騎鉦車介士前後鼓吹以驃騎

將軍官屬及司空法駕與公卿尚書三臺以下葬我文
烈侯三年九月甲申小祥會如初四年九月戊申大祥
公卿尚書三臺以下會如小祥之禮公之祖納忠於前
朝以罹艱禍父隱約蟄瘁治家師導惟儉之尚公生值
歉徧資賄屢空手執勤役遠涉道里以修經術險阻艱
難曷所不嘗特以其靜則貞一審固動則不違則度含
容覆載無競伊人謀無不忠言無不信自在弱冠布衣
之中固已流芳名著茂實公孫同倫莫能齊焉者矣州

郡禮招莫之能屈委百里位辟公車令自侍御史侍中已往道為帝師德為世表體尊名重階級彌崇而公處以恭遜行以固慎德大而心小居高而志降夫驕吝之訓周公其猶病諸而公脫然以為行首不亦泰乎及其所以匡輔本朝忠言嘉謀造膝危辭當事而行言從計納亦不敢宣密誠潛功貽於帝躬家無遺草論者不見嗟乎誠為達事君之體得人臣之上儀者已公素不貴歸非不樂引美故雖彷彿猶不敢載以順公之雅初受封

自以功不副賞前後固辭章凡十上憂慍悄悄形於容
色雖不克從情旨昭顯晚節為廷尉公曰昔在三后成
功惟殷於民而臯陶不與焉蓋吝之也及為特進又曰
惟漢重臣中興以來克稱斯位者其惟高密元侯乎吾
何德以堪諸寢疾顧命無辭要言約戒忠儉而已孤彪
銜恤永思綴輯所履以贊銘之銘曰赫赫烈侯卓爾超
倫於惟楊公乃華降神故能明哲德亞聖人受茲介福
位極人臣包羅五典本道根真為國之師誨上經文頻

歷鄉校五登鼎鉉建名著忠確越前賢攘災興化蟲豸
不臻風雨以時屢獲有年三葉宰相應祚於天臨晉是
侯子子孫孫億兆不窮如山之堅四時潔祀以承所尊
祀事孔明奉亡如存馥馥芬芬用慰顯覲



蔡中郎集卷五

欽定四庫全書

集部

蔡中郎集卷六

詳督管監察御史_臣曹錫寶

檢討_臣何思鈞覆勘

總校官編修_臣王燕緒

校對官編修_臣秦泉

謄錄監生_臣朱衣

欽定四庫全書

蔡中郎集卷六

漢 蔡邕 撰

太尉汝南李公碑

公諱咸字元卓汝南西平人蓋秦將李信之後孝武大將軍廣之胄也枝流葉布家於茲土文武繼踵世為著姓曾祖父江夏太守伯父東郡太守公受純懿之資萃忠清之節夙夜嚴慄孝配大舜敦詩書而悅禮樂觀天

文而察地理動與神合契抗流行操邁伯夷德追孔父
舉孝廉除郎中光祿茂才遷衛國公相受高密令勤恤
民隱政成功簡遷徐州刺史百官震肅饗飮風靡惡直
醜正恭事法宮帝念其勤屢被榮命漁陽太守還遷度
遼將軍協德魏絳和戎綏邊徵河南尹母憂乞行服闋
奔命孝和皇帝時機密久缺百僚僉允詔休尚書歷僕
射令納言危行不紕以公事去民神憤怒羣公薦之帝
曰俞哉徵拜將作大匠大司農大鴻臚大僕射公所莅

任憲天心以教育激垢濁以揚清懿鑠之美昭登於上
丕顯之化宣聞於下及遷台司位太尉補袞闕叙彝倫
天人交格終始無疵雖元凱翼虞周召輔姬未之或踰
功遂身退以疾自遜求歸田里告老致仕七十有六嘉
平四年薨海內咨嗟莫不惻焉故吏潁川太守張溫等
相與嘆曰名莫隆於不朽德莫盛於萬世銘勒顯於鍾
鼎清烈光於來裔刊石立碑德載不泯詞曰天垂三台
地建五岳降生我哲應鼎之足奕世載德名昭圖錄旣

文且武桓桓紹續外則折衝內則大麓惟清惟敏品物
以熙告老懸車天人靡欺曾不百齡圯我國基人之云
亡八極悼思申德作頌光寵宣流錫紀斯石鴻烈顯休

劉鎮南碑

君諱表字景升山陽高平人也君應期挺生瑰偉大度
黃中通理博物多識為郡功曹千里稱平上計吏辟大
將軍府遷北軍中侯在位十旬以賢能特選拜刺史荆
州永平元年十一月到官清風先驅莫不震肅奸宄改

節不仁引頸君乃頒愷悌流惠和慕唐叔之野棠思王
遵之驅車賦政造次德化宣行俄而漢室大亂禍起蕭
牆賊臣專政豪雄虎爭縣邑閭里奸宄烟發州縣殘破
天下土崩四海大壞當是時也雖有孔翟之聖賢育賁
之勇勢無所措其智力君遇險而建畧遭難而發權招
命英俊爰得驍雄謀臣武將合策明計出次北境遷屯
漢陰因滄浪以為隍即春葉以為墉南撫衡陽東綏淄
沂西靖巫山保乂四疆選才任良式序賢能簡將命卒

綦布星陳備要塞之成八方之邊勸穡務農以田以漁
稔粟紅腐年穀豐夥江湖之中無剽掠之寇沅湘之間
無攘竊之民郡守令長冠帶章服府寺亭鄉崇棟高門
皆如其舊當世知名輻輳而至四方襁負自遠若歸窮
山幽谷於是為邦百工集趣機巧萬端器械變通利民
無窮隣邦懷慕交揚益州盡遣驛使冠蓋相望下民有
康哉之歌羣后有歸功之緒莫非嘉績克厭帝心即遷
州牧又遷安南將軍領州如故於時諸州或失土流播

或水潦沒害人民死喪百遺二三而君保完萬里至於
滄海聖朝欽亮析圭授土遣御史中丞鍾繇即拜鎮南
將軍錫鼓吹大車策命褒崇謂之伯父置長史司馬從
事中郎開府辟召議如三公上復遣左中郎將祝耽授
節以增威重升督交揚二州委以東南惟君所裁雖周
召授分陝之任不遠過也交州殊遠王塗未夷夷民歸
附大小受命其郡縣長吏有缺皆來請之君權為選置
以安荒裔輒別上聞齊桓遷邢封衛之義也武功旣亢

廣開靡泮設俎豆陳壘藝親行鄉射躋彼公堂篤志好學吏民子弟受學之徒蓋以千計洪生巨儒朝夕講誨閭閻如也雖洙泗之間學者所集方之無異也深愍末學遠本離實乃令諸儒改定五經章句刪剗浮辭艾除煩重又求遺書寫還新者留其故本於是古典畢集充於州閭及延見武將文吏教令溫雅禮授優隆言不及軍旅之事辭不逮官曹之文上論三墳八索之典下陳世教忠義之方內剛如秋霜外柔如春陽不伐其善不

有其庸如彼川流每往滋通可謂理道丕才命世希有者已仁者壽宜享期耆昊天不弔年六十有七建安十三年八月遘疾殞薨耕夫罷耜織女投杼老幼哀號若喪父母時道路艱險留墳州土轉移歸葬父勉其子妻勉其夫欲共扶送至於鄉里南陽太守樂鄉亭侯吳思等言及志在州里者各發卒具送靈柩之資子授徵拜五官中郎將乃疏上請歸本縣葬見聽許大和二年塋於先塋於是臣故忻洽咸以為申伯韓侯之翼周室受

輅車乘馬玄裘赤舄之賜詩人詠功列於大雅至今不
朽況乎將軍牧二州歷二紀功載王府賜命優備賴而
生者毓子孕孫能不歌嘆乃作頌曰猗歟將軍膺期挺
生桓桓其武溫溫其仁初翰千里允顯使臣幕府禮命
集於北軍督齊禁旅如羆如熊眷然南顧綏我荊衡將
軍之來民安物豐江湖交壤刑清國興蔽芾甘棠召伯
聽訟周人勿剗我賴其楨欲報之德胡不億年如何殂
逝孤棄萬民鐫勒墓石以紀洪勲昭示來世垂芳後昆

朱公叔墓前石碑

維漢二十一世延熹六年粵四月丁巳忠文公益州太守朱君名穆字公叔卒於京師其五月丙申塋於宛邑北萬歲亭之陽舊兆域之南其孤野受顧命曰古者不崇墳不封墓祭服雖三年無不於寢今則易之吾不敢也爾其無拘於俗無廢予誠野欽率遺意不敢有違封墳三板不起棟宇乃作祠堂於邑中南白陽里備器鑄鼎銘功載德懼墳封彌久夷於平壤於是依德像緣雅

則設茲方石鎮表靈域用慰其孤罔極之懷乃申詞曰
歆惟忠文時惟朱父實天生德丕承洪緒彌綸典術允
迪聖矩好是貞厲疾彼強禦斷剛若仇柔亦不如仍用
明夷邁難受侮帝曰休哉朕嘉乃功命汝納言肩汝祖
蹤父拜稽首翼翼惟恭謂篤不忘夙夜在公昊天不弔
降茲殘殃不遺一父俾屏我皇我皇悼心錫詔孔傷位
以益州贈之服章用刊彝器宣昭遺光子子孫孫永載
寶藏

朱公叔鼎銘

忠文朱公名穆字公叔有殷之胄微子啟以帝乙元子
周武王封諸宋以奉成湯之祀至元子啟生公子朱其
孫氏焉後自沛遷於南陽之宛遂大宗爵位相襲列祖
尚書令肅宗之世守於臨淮考曰實為陳留太守乃及
忠文克慎明德以紹服祖禰之遺風悉心臣事用媚天
子顯允其勲蹟尋綜六藝契濶馳思所以啟前惑而覺
後疑者疊疊焉雖商偃其猶病諸初舉孝廉除郎中尚

書侍郎獨念運際存亡之要乃陳五事諫謀深切退處
畎畝以察天象驗應著焉孝順晏駕賊發江淮時辟大
將軍府實掌其事用拜宛陵令非其好也遂以疾辭復
辟大將軍再拜博士高第作侍御史明司國憲以齊百
僚矯枉董直固肯阿順以黜其位潛於郎中羣公並表
乃遷議郎登於東觀纂業前史於時冀州凶荒年饑民
墮而貪婪之徒乘之為虐錫命作牧靜其方隅乃攄洪
化奮靈武昭令德塞羣違貞良者封植殘戾者芟夷去

惡除盜無俾比而作慝用陷於非辜復徵拜議郎病免
官徵拜尚書清一以考其素正直以醇其德出納帝命
乃無不允雖龍作納言山甫喉舌靡以尚之享年六十
有四漢皇二十一世延熹六年夏四月乙巳卒於官天
子痛悼詔曰尚書朱穆立節忠亮世篤爾行虔恪機任
守死善道不幸而卒朝廷憫焉今使權謁者中郎楊賁
贈穆益州刺史印綬魂而有靈嘉其寵榮嗚呼哀哉肆
其孤用作茲寶鼎銘載休功俾後裔永用享祀以知其

先之德

陳留太守胡公碑

君諱碩字季獻交趾都尉之孫太傅安鄉侯少子也其
先與楚同姓別封於胡以國為氏臻乎漢奕世載德不
替舊勲君幼有嘉表克岐克嶷不見異物習與性成孝
於二親養色寧意烝烝雍雍雖曾閔顏萊無以尚也總
角入學治孟氏易歐陽尚書韓氏詩博綜古文周覽篇
籍言語造次必以經綸加之行已忠儉事施順恕公體

所安與衆共之驕吝不萌於內喜愠不形於外可謂無
競維人溫恭淑慎者也初以公在司徒除郎中宿衛十
年遭叔父憂以疾免州郡交辟皆不就後以大將軍高
第拜侍御史遷諫議大夫以將軍事免官舉賢良方正
不詣公車建寧元年召拜議郎納忠盡規匪懈於位遷
侍中虎賁中郎將是年遭疾屢上印綬詔書聽許以侍
中養疾其年七月被尚書召不任應命詔使謁者劉惔
賫印綬即拜陳留太守君聞使者至加朝服拖紳使者

致詔君以手自繫陳辭謝恩其明二十一日遣吏奉章
報謝意氣精朗是日疾大漸刻漏未分奄忽而卒時年
四十一天子憫悼詔使者王謙送葬以中牢具祠賜錢
五萬布百足贈穀三千斛同位畢至赴弔雲集生榮未
艾沒有餘哀於是遐邇搢紳爰暨門人相與嘆述君德
追痛不置恒切情慄無不永懷行由已作名自人成先
民既邁賴茲頌聲嗟我明哲如何勿銘乃作辭曰猗歟
懿德令聞有彰祇服其訓克構克堂孝思維則文藝丕

光敦厚忠恕衆悅其良綏弱以仁不云我强爰自登朝
進退以方見幾而作如鴻之翔乃位常伯恪處左右兼
掌虎賁禁戎允理邁茲虐疴帝用悼止俾守陳留庶篤
其祉王人既詔景命不俟嗚呼昊天殲我英士如何贖
也命不自已哀哉永傷萬年是紀

太守胡公碑銘

君諱碩字季叡交趾都尉之孫太傅安樂侯之子也順
帝時為郎中桓帝時遭叔父憂以疾自免荊州將軍每

辟輒辭疾後以高等拜侍御史遷諫議大夫舉賢良方正病不詣公車建寧元年七月拜陳留太守病加不任應召詔使謁者劉惔即授印綬二十一日卒詔遣使者王謙以中牢具祠特賜錢五萬布一百疋贈穀三千斛儔類赴送遠近鱗集於時陳留主簿高吉蔡軫等咸以郡選充備官屬來迎者三十四人奔驚跋涉願承清化逢天之戚不獲延祚痛心絕望忉怛永慕乃相與衰經庭位號咷靈柩將窆申勅修儀疾在輿服窆位部引各

執其職路人感愴觀者歎息遂樹碑作銘以表令德於
藐下國瞻仰俊乂欽見我君爰綏我惠式昭績思有勞
其悴昊天不弔景命顛墜悠悠烝黎惆悵喪氣政雖未
宣古之遺愛祁祁我君習習冠蓋修誠以迓曾不東邁
靈魂徘徊靡所瞻逮惟其傷矣胸肝摧碎勒銘告哀傳
千萬代

琅邪王傳蔡公碑

君諱朗字仲明蓋倉頡之精胤姬稷之末胄也昔叔度

文王之昭建侯於蔡以國氏焉迄於平襄周祚微缺王
室遂卑齊晉交爭強楚侵陵昭侯徙於州來公族分遷
氏家於圉奕葉載德常歷宮尹以逮於茲君雅操明允
威厲不猛履孝悌之性懷文藝之才包洞典籍刊摘沉
秘知幾達要通含神契既討三五之術又采二南之業
以魯詩教授生徒雲集莫不自遠並至栖遲不易其志
簞食曲肱不改其樂心棲清虛之域行在玉石之間是
以德行儒林智周當代四岳稱名帝曰予聞元和元年

徵拜博士舒演與秘贊理闕文所立卓爾度躡雲蹤其
選士也抑頑錯枉進聖擢偉極遺逸於九臯揚明德於
側陋拔茅以彙幽滯用濟加以清敏廣平好是正直規
誨之策日諫王庭忠諫著列令聞流行聖朝以藩國貴
胄先帝遺體或以繼絕襲位正於阿保未洽雅訓驕盈
僭差或蹈憲理非弘直碩儒莫能匡弼蔡君審行修德
進退可度遷河間中尉琅邪王傳乃從經術之方示以
裴謚之威率禮莫違其國用靖雖安國之輔梁孝仲舒

之相江都靡以加焉勲績既盛帝簡其功將授上位遷
於紫宮賦壽不永邁此疾凶年五十八永興六年夏卒
嗚呼哀哉凡百君子咨痛罔極殷懷傷悼含涕流惻如
何昊天喪我師則爰勒斯銘式昭其德天縱明哲於赫
我君含弘光大玄覽孔真潛樂教思韞玉衡門雲龍感
應養徒三千珠藏外耀鶴鳴聞天若時徵庸登祚王臣
綜彼前疑定此典文叅佐七德俾相大藩身沒稱顯永
遺令勲表行揚名垂示後昆

汝南周巨勝碑

君諱勰字巨勝陳留太守之孫光祿勲之子也君應坤
乾之淳靈繼命世之期運玄懿清朗貞厲精粹體仁足
以長人嘉德足以合禮總六經之要括河洛之機爰天
心以立鈞贊幽明以揆時沉靜微密淪於無內寬裕弘
博含於無外巨細洪纖罔不總也是以實繁於華德盈
於譽初以父任拜郎中疾去官察孝廉是時郡守梁氏
外戚貴寵非其好也遂以病辭太守復察孝廉乃俯而

就之以明可否然猶私存衡門講誨之樂不屑已也又委之而旋故大將軍梁冀專國作威海內從風世之雄才優逸之徒莫不委質從命而顛覆者蓋亦多矣聞君洪名前後三辟卒不降身由是搢紳歸高羣公事德太尉司徒再辟三辟察賢良方正州舉孝廉皆病不就擢之際灾眚仍發聖上詢咨師錫策公車特徵君仰瞻天象俯察人事世路多險進非其時乃托疾杜門靜居里巷無人跡外庭生蓬蒿如此者十餘年強禦不能奪

其守王爵不能滑其慮至延熹二年乃更闢門延賓享宴娛樂及秋而梁氏誅滅十二月君卒然則識幾知命可觀於此矣洋洋乎若德雖崇山千仞重淵百尺未足以喻其高究其深也夫三精垂耀處者有表爰在上世作者七人焉有該百行備九德齊光日月洞靈神明如君之至者與亶所謂天民之秀也享年五十不登期考遐邇歎悼痛心矢圖乃相與建碑勒銘以旌休美其辭曰厥初生民天賜之性有龐有醇有否有聖伊惟周君

允卜其政誕茲明德自貽哲命煥乎其文如星之布確
乎不拔如山之固追崇先緒應期作度潛心大猷覃思
德謨遁世無悶屢辭王寮洋洋泌丘於以逍遙茂爾童
蒙是訓是教瞻彼榮寵譬諸雲霄優哉游哉侔此弘高
名振華夏光耀昆苗清風丕揚德音孔昭

彭城姜伯淮碑

先生諱肱字伯淮彭城廣人也其先出自帝胄在皇唐
蓋與四岳共業能禮於神舜命秩宗爰封於呂其裔呂

望佐周克殷俾侯齊國姓有姜氏即其後也高祖祖父
皆豫章太守潁陰令先生既蹈先世之純德體英妙之
高姿立性純固百行修備故其平生所能事親惟孝如
大舜五十而慕友於兄弟有常棣之華萼韡之度體惠
理和有上德之素安靜守約恩及嬰兒至操動信邑中
化之外戶不閉治藏無隱及其學而知之者三墳五典
八索九丘俯仰占候推步陰陽有名物定事之能獨見
先睹之效然猶學而不厭誨人不倦童冠自遠方而集

者蓋千餘人夫水盈而流德交而形是故德行外著洪聲遠布華夏同稱名振當世凡十辟公府九舉賢良方正公車特徵玄纁禮聘起家拜犍為太守太中大夫先生盤桓育德莫之肯就不隕穫於貧賤不充詘於富貴拔乎其萃出乎其類生民之傑也年七十有七建安二年四月辛巳卒於是從遊弟子陳畱申屠蟠等悲悼傷懷懼微言之欲絕感絕倫之盛事乃建碑於墓甄述景行邈矣先生應天淑靈孝友是備上德是經弘此文藝

耽怡是寧恂恂善誘童冠來誠有燧其譽有煥其聲顯
顯羣公並如辟命赫赫聖皇仍獲其聘委策避國守此
玄靜綽乎其裕確乎其操疇昔洪崖雙名並高嗟乎殞
沒搢紳永悼依依我徒靡則靡效勒銘金石彌遠益曜

貞節先生范史雲銘

先生諱丹字史雲陳留外黃人陶唐氏之後也其在周
室有士會者為晉大夫以受范邑遂以為氏漢文景之
際爰自南陽來家於成安生惠延熹二年官至司農廷

尉君則其後也君受天正氣志高行潔在乎幼弱固已
藐然有烈節矣時人未之或知屈為縣吏亟從仕進非
其好也退不可得乃託死遁去親戚莫知其謀遂隱竄
山中涉五經覽書傳尤篤易與尚書學立道通久而後
歸遊集大學知人審友苟非其類無所容納介操所在
不顧貴賤其在鄉黨也事長惟敬養稚惟愛言行舉動
斯為楷式郡縣請召未嘗屈節其有備禮招延虛已遂
止亦為謀奏盡其忠直以處士舉孝廉除郎中萊蕪長

未出京師喪母行服故事服闋後還郎中君遂不從州
郡之政凡其事君過則弼之闕則補之通清夷之路塞
邪枉之門舉善不拘階次黜惡不畏強禦其事繁多不
可詳載雅性謙儉體勤能苦不樂假借與從事荷負徒
行人不堪勞君不勝其逸辟大尉府俄而冠帶或以羣
黨見嫉時政用受禁錮君罹其罪閉門靜居九族中表
莫見其面晚節禁寬困於屢空而性多檢括不治產業
以為卜筮之術得因吉凶道治民情以受薄償且無咎

累乃鬻卦於梁宋之域好事者覺之應時輒去禁既蠲
除太尉張公司徒崔公前後四辟皆不就仕不為祿故
不牽於位謀不苟合故特立於時是則君之所以立節
明行亦其所以後時失途也年七十有四中平二年四
月卒太尉張公兗州劉君陳留太守淳于君外黃令劉
君僉有休命使諸儒叅按典禮作誄著諡曰貞節先生
昭其功行錄記所履謀於耆舊刊石樹銘光示來世於
顯貞節天授懿度誕茲明哲允迪德譽如淵之清如玉

之素溷之不濁涅之不汙用行思忠舍藏思固伯夷是
師史鮪是慕榮貧安賤不恡窮迂甘死善道遺名之故
身沒譽存休聲載路

玄文先生李子材銘

玄文先生名休字子材南陽宛人也其祖李伯陽周柱
下史覲衰世而遁焉其後雄俊豪傑往往崛起出自戰國
及漢名臣繼踵交胄散逸其遷於宛尚矣王莽竊位漢
祚中移考翼佐世祖匡復郊廟錫封茅土卿相牧守於

時相遂休少以好學游心典謨既綜七經又精羣經鉤
深極奧窮覽妙旨居則玩其辭動則察其變雲物不顯
必考其占故能獨見前識以先神意若古今常難疑義
錯繆前人所希論後學所不覽休盡剖判剝散幽暗靡
不昭爛猶發憤於目所不睹體所不閑遂登東岳觀百
王遺風習容闕里以協禮衷退而講誨童冠仰焉傳傳
如也郡署五官掾功曹司空胡公顯以儒譽特進大鴻
臚仍優禮固請秉諫執虛辭此三命不為利回不為義

疾臨寵審已不動其守可謂純潔皓素綽有餘裕者已
其於鄉黨細行敦睦九族篤信交友不可得而詳也初
娶配出後配未字年既五十苗胤不嗣以永壽二年夏
五月乙未卒凡其親戚朋徒相與大會而塋之鼎俎之
禮節文曲備時令戴君臨喪命謚郡遣丞掾冠蓋咸屆
既定而後罷焉於是故好朋舊僉以仲尼既沒文不在
茲韞積美玉喪莫賈之求而無總懷爾永思乃刊斯石
懿德是不吁茲先生秉德恭勤天啟哲心其學孔純經

緯是遵雅麗是分行已守道匪禮不遵處約不戚聞寵
不欣榮不能華威不能震天淑厥命以讓以仁有惠云
載惟邦之楨按典考謚謚以立文身沒名彰配黔作隣
遺譽罔極丕昭億年嗚呼哀哉

處士圈叔則銘

伊漢二十有一世處士有圈典字叔則者夫其生也天
真淑性清理條暢精微周密包括道要致思無形深總
歷部纖入藝文藻分葩列如春之榮守根據窮不虛其

聲偉德若茲惟世之英乃遂隱身高藪稼穡孔勤童蒙
來求彪之用文不義富貴譬諸浮雲州郡禮招休命交
集徒加名位而已莫之能起也博士徵舉至孝恥已處
而復出若有初而無終潔耿介於丘園慕七人之遺風
年七十有五建寧二年六月卒臨沒顧命曰知我者其
蔡邕乃為銘載書休美俾來世昆裔永有諷誦於先生
之德其辭曰民之齊敏卓時挺生思心精覈綜物通靈
術有玄妙於時游情聞道睹異惕然若驚守死善操與

世無營渾其若濁徐然後清綽其若煥終其益貞有恒
實難獨秉其經嗟爾來世是瞻是聽

陳留索昏庫上里社銘

曰社祀之建尚矣昔在聖帝有五行之官而共工子句
龍為后土及其沒也遂為社祀故曰社者土地之主也
周禮建為社位左宗廟右社稷戎醜攸行於是受賑土
膏恒動於是祈農又頌之於兆民春秋之中命之供祠
故自有國至於黎庶莫不祀焉惟斯庫里古陽武之戶

牖鄉春秋時有子華為秦相漢興陳平由此社宰遂佐
高帝克定天下為右丞相封曲逆侯永平之世虞延為
太尉司空封公至嘉平延弟曾孫放字子卿為尚書外
戚梁冀乘寵作亂首策誅之王室以績封召都亭侯太
僕太常司空毗天子而維四方克措其功徃烈有常於
里同監爰暨邦人僉以為宰相繼踵咸出斯里秦一漢
三而虞氏世焉雖有積善餘慶修身之致亦斯社之所
相也乃與樹碑作頌以示後昆惟王建祀明事百神乃

顧斯社於我兆民明德惟馨其慶聿彰自嬴及漢四輔
代昌爰我虞宗乃世重光元勲既立錫茲土疆乃公乃
侯帝載用康神人協祚且巨且長凡我里人盡受嘉祥
刊銘金石永世不忘

京兆樊惠渠頌

洪範八政一曰食周禮九職一曰農有生之本於是乎
出貨殖財用於是在九土上沃為大田多稔然而地
有垆塿川有墊下溉灌之便行趨不至明哲君子創業

農事因高卑之宜驅自行之勢以盡水利而富國饒人
自古有焉若夫西門起鄴鄭國行秦李冰在蜀信臣治
穰皆此道也陽陵縣東其地衍隄土氣辛螯嘉穀不植
草萊焦枯而涇水長流溉灌維首編戶齊氓用力不供
牧人之吏謀不暇給蓋常興役猶不克成光和五年京
兆尹樊君諱陵字德雲勤恤人隱悉心政事苟有可以
惠斯人者無聞而不行焉遂諮之郡吏申於政府僉以
為因其所利之事者不可已者也乃命方畧大吏勸遂

令伍瓊揣度計慮揆程經用以事上聞付在三府司農
遂取財於豪富借力於黎元樹柱累石委薪積土基跂
工堅體勢强壯折湍流款曠陂會之於新渠疏水門通
窮瀆灑之於畝畝清流浸潤泥潦浮游昔日鹵田化為
甘壤稷黍稼穡之所入不可勝筭農民熙怡悅豫相與
謳談疆畔斐然成章謂之樊惠渠云其歌曰我有長流
莫或遏之我有溝澮莫或達之田疇斥鹵莫修莫釐饑
饉困悴莫恤莫思乃有樊君作人父母立我畝畝黃潦

膏凝多稼茂止惠乃無疆如何勿喜我壤既營我疆斯
成泯泯我人既富且盈為酒為釀烝彼祖靈貽福惠君
壽考且寧

京兆尹樊德雲銘

於顯哲尹誕德孔彰膺帝休命謂篤不忘爰納忠式規
悟聖皇欽崇國邑大孝允光九命車服昭示采章軒輶
四牡承祀烝嘗多士時貢徭役永息道路孔夷民清險
息同體諸舊兆氓蒙福惠垂無疆守以罔極

九疑山銘

巖巖九疑峻極於天觸石膚合興播連雲時風嘉雨浸
潤下民芒芒南土實賴厥勛逮於虞舜聖德光明克諧
頑傲以孝烝烝師錫帝世堯乃受徵受終文祖璇璣是
承泰階以平人以有終遂葬九疑解體而升登此崔嵬
託靈神仙

焦君贊

猗歟焦君常比玄墨衡門之下栖遲偃息泌之洋洋樂

以忘食鶴鳴九臯音亮帝側乃徵乃用將受袞職昊天
不弔賢人邁慝不獲一志并此四國如何穹蒼不照斯
域惜哉朝廷喪茲舊德恨伊學士將何法則

王子喬碑

王孫子喬者蓋上世之真人也聞其仙舊矣不知興於
何代博問道家或言潁川或言彥蒙初建斯域則具斯
丘傳承先人曰王氏墓紹脣不繼荒而不祠歷載彌年
莫之能紀暨於永和元年十有二月當臘之夜上有哭

聲其音甚哀附居者往聞而恠之明則登其墓察焉洪
雪下無人蹤見一大鳥跡有祭祀之處左右或以為神
其後有人着絳冠大衣杖竹策立冢前呼樵孺子尹禿
謂曰我王子喬也爾勿復取吾先人墓前樹也須臾忽
然不見時令太山萬熙稽古老之言感精瑞之應咨訪
其驗信而有徵乃造靈廟以休厥神於是好道之儔自
遠來集或絃歌以詠太一或談思以歷丹田其疾病疴
瘵者靜躬祈福即獲祚若不虔恪輒顛踣故知至德之

宅兆真人之先祖也延熹八年秋八月皇帝遣使者奉
犧牲以祭祀祇懼之敬肅如也相國東萊王章字伯義
以為神聖所興必有銘表昭示後世是以賴鄉仰伯陽
之蹤闢民慕尹喜之風乃會長史邊乾訪及士隸遂樹
玄石紀遺烈俾志道者有所覽焉詞曰伊王君德通靈
含光耀秉純貞應大道羨久榮棄世俗飛神形翔雲霄
浮太清乘螭龍載鶴輶戴華笠奮金齡揮羽旗曳霓旌
懽罔極壽億齡昭篤孝念所生歲終闕發丹情存墓冢

舒哀聲遺鳥跡覺舊城被絳衣垂紫纓呼孺子告姓名
由此悟感怖驚修祠宇反几筵饋饌進甘香陳時傾願
馨明禋匡流祉熙帝庭祐邦國相黔民光景福耀無垠

漢交趾都尉胡夫人黃氏神誥

夫人江陵黃氏之季女字曰列羸其先出自伯翳別封
於黃以國氏焉高祖父汝南太守曾祖父延城大尹祖
父番禺令父以主簿嘗證太守事奉明君以立臣節漢
南之士以為美談初都尉君娶於故豫州刺史即黃君

之姊生太傅安樂侯廣及卷令康而卒繼室以夫人生
童紀未甦而天夫人懷聖善之姿韜慈母之仁撫育二
孤導以義方思齊先姑神罔時恫故能迄用有成誕膺
繁祉廣歷五卿七公再封之祿康亦由孝廉宰牧二城
九鼎之義夫人是享爰暨稚孫更仕三宮或典百里或
作虎臣銀艾貂蟬近侍顯尊爰茲介福於我夫人自郡
尉仕於京師及廣兄弟式叙漢朝夫人居京師六十有
餘載其乘輅執贄朝皇后採桑於蠶宮手三盆於繭

館者蓋三十年上有帝室寵光之休下有堂宇斤斤之祚心耽其榮體安其玄遠圖長慮用遺舊居欲留此焉康寧之時亟以為言太夫人年九十一建寧二年薨於太傅府是月辛酉公之季子陳留太守碩卒於洛陽左池里舍公銜哀悼祇慎其屬遵奉遺意不敢失墜乃俾元孫顯咨度羣儒以考其衷僉曰昔舜帝沒於蒼梧殯於虞郊二妃薨於江湘不即兆於九疑延陵季子實惟吳人長子道終卜塋羸博夫遭時而制不遠遷徙覓氣

所之不繫丘壠帝舜以之神往時怨季札以之仲尼嘉
焉鑒帝籍之高論綜精靈之幽情稽先人之遐迹順母
氏之所寧茲事體通而義同允不可替於是公乃為辭
昭告先考然後卜定宅兆龜筮悉從遂營窆窆之事舉
封樹之禮十月既望粵翌日己酉塋我夫人黃氏及陳
留太守碩於此高原雒陽東界關亭之阿天子使中常
侍謁者李納弔且送塋持賻錢二十萬布二百匹再以
中牢祠羣后畢會榮哀孔備於時濟陽故吏舊民中常

侍勾陽子肅等二十三人思舊慕化推本議銘著斯碑
石俾諸昆裔瞻仰以知禮之用是為神語乃申頌曰於
穆夫人家邦之媛昔在嬴代王國氏建至於近祖亦降
於漢天祚明德福祿流衍既作母儀履信思順登壽耄
耄用永蕃嬖子孫以仁追稽先典厝茲洛濱齊跡湘靈
配名古人休矣耀光千億斯年

太傅安樂侯胡公夫人靈表

夫人編縣舊族章氏之長女也字曰顯章令儀小心秉

操塞淵仁孝婉順率禮無遺體季蘭之姿蹈思齊之跡
永初二年年十有五爰初來嫁誕成家道仰奉慈姑竭
歡致敬俯誨膝下化導周悉至德修於幾微徽音暢於
神明故能叅姒妣之功兼生人之榮朝春路寢贊桑蠶
宮光寵有祭祭服有煒前後奉斯禮者三十餘載夫人
生五男長曰整伯齊次曰千億叔韓次曰寧稗威次曰
碩季叡伯仲各未加冠遭厲氣同時夭折叔上郡孝廉
季更歷州寧舉茂才葉令京令為議郎季以高第為侍

御史諫議大夫侍中虎賁中郎將陳留太守皆早即世
夫人哀悼劬悴由是被疾遭太夫人憂篤年七十七建
寧三年薨夫人之存也契濶中饋婉戀供養依生奉仁
紹述雅意具閨月祔於太夫人窀穸於茲地魂而有靈
欽明定省神心欣焉其實寧之元女金盈追慕永思惜
怛罔極遂及斯表鐫著堅珉頌曰悲母氏之不永懷殷
恤以摧傷惟子道之無窮惜聞誨之未央庶黃耆以期
頤胡委我以夙夜恒思心以激切亦割肝以絕腸昔先

聖之遺辭言仁者其壽長嗟母氏之憂患體愷悌以慈
良失延年之報祜獨何棄於穹蒼日月忽以將暮抱長
結以含愁尋修念於在昔原疾病之所由遭元子之弱
天心傷悴以自憂暨叔季之殞終哀情結以彌綢皇姑
沒而中感遂大漸兮速流疾皛皛而日遘氣微微以長
浮銷精覓以遐翔曾不可乎援留爾乃順旨於冥冥繼
存意於不違爰附靈於皇姑尚覓覓之有依潛幽室之
黯漠惜昭明之景輝一往超以未及傾徂邈其彌遲顧

新廟以累歎伏几筵而增悲嗟既逝之益遠眇悠悠而莫追

司徒袁公夫人馬氏碑銘

維光和七年司徒袁公夫人馬氏薨其十一月塋哀子懿達仁達銜恤哀痛靡所寫懷乃撰錄母氏之德履示公之門人睹文感義采石於南山諮之羣儒假貞石以書焉夫人右扶風平陵人也曾祖中水侯祖將作大匠考南郡太守中水侯弟伏波將軍女在淑媛作合孝明

誕生孝章婚姻帝室世為名族夫人生應靈和德貞性
妙角犀豐盈實有偉表溫慈惠愛慎而寡言幼從師氏
四體之教早達窈窕德象之儀及笄求匹明哲供治婦
業孝敬婉孌畢力中饋後生仰則以為謀憲自公歷據
王官至宰相夫人營克家道扶翼政事聰明達乎中外
隱括及乎無方不出其機化導宣暢童子無驕逸之尤
婦妾無捨力之愆故能窮生人之光寵獲福祿之豐報
朝春政於王室躬桑繭於蠶宮春秋六十有三寢疾不

永懿等追想定省尋思髣髴哀窮念極不知所裁乃申
辭曰於穆母氏其德孔休思齊先始百行聿脩宣慈惠
和恩澤並周義方之訓如川之流俾我小子蒙昧以凝
不享遐年以永春秋往而不返潛淪大幽嗚呼哀哉几
筵虛設幃帳空陳品物猶在不見其人魂氣飄飄焉所
安神兄弟何依姊妹何親號咷切怛曾不我聞吁嗟上
天何辜而然傷逝不續往者不旋

濟北相崔君夫人誄

維延熹四年故濟北相崔夫人卒嗚呼哀哉世喪母儀
宗殞憲師哀哀孝子靡所瞻依凡百赴弔至止增悲投
涕歔歔共叙赫姿乃為誄曰清和有鑠時惟哲母令儀
令色爰以資始塞淵其心淑慎其止於母斯勤在子斯
敏仰覽篇籍俯釐絲枲多才多藝於何不有休譽邈焉
允女之英乃及崔君惟德是行其德伊何實粹實明虔
恭事幾契濶中饋敦此婉順疾彼攸遂思齊徽音晨興
夜寢穆穆其猷莫之與二天祚明德底之方穀於赫崔

君膺茲祉祿夫人有肩翼此清淑仁風溫潤義惠優渥
推恩中外施浹族食不兼膳服不纖縠以儉為榮以
奢為辱堂堂其肩惟世之良於其令母受茲義方訓以
柔和平以嚴剛怒不傷愛喜不亂莊納之軌度終然允
臧是用登膺享其寵光雖則崇盛猶匪寧息同其婦子
茂師其職服貴無荒尊不舍力密勿不忘惟德之極昔
在共姜陪臣之母勞謙紡績仲尼是紀矧茲夫人帝室
命婦猶日孜孜復禮克己人亦有言仁者壽長宜登永

年黃耆無疆昊天不弔降此殘殃寢疾彌留精爽悴傷
慘怛孝子惴惴其惶靡神不舉無藥不將嗚呼哀哉於
是孝子長叫氣絕復蘇號呼告哀不知其辜昊天上帝
忍弔遺孤尋想遊靈馬識所徂嗚呼哀哉既殯神柩薄
言于歸冢宰喪儀循禮無遺切切喪主瘠羸哀哀情兮
長慕涕兮無晞行旅揮涕千里於咨乃謀卜筮言考其
良建彼兆域於時翳藏冥冥窀穸無時有陽燈燭既滅
馬道納光形影不見定省何望嗟其哀矣不可弭忘日

月代序古有如喪由斯夫人榮烈有章配質士彥旣隆
且昌顧景赫奕饋供孔將惟以慰懷庶無永傷嗚呼哀
哉

議郎胡公夫人哀讚

議郎夫人趙氏字曰永姜允有令德秉心塞淵舒詳閒
雅儀節孔備女師四典窈窕德象罔不習熟以供婦道
議郎早世檢誨幼孤義方以導其性中禁以閑其情孤
顯儉節用免咎悔少辟侍中襲先公之爵以議郎出為

濟陰太守是時夫人寢疾未薨而國家方有滎陽寇賊
震驚帝師簡選州辟授任追衛不得辭王命親醫藥夫
人乃自矜精稟氣力俛起若愈以勸遣顗到官月餘所
疾暴盛春秋五十八中平四年薨於京師顗有剖符之
寄偏於國典疾篤不得顧親增感氣絕不能自宥慎終
之事闕焉永廢雖不毀以隨沒亦因悴而傷懷知我如
此不如勿生號咷告哀以乞骸骨踰年然後獲聽追維
考君存時之命迎棺舊土同穴此城孤心摧割靡所底

念仰瞻二親或有神誥靈表之文敢曰亮闇叙我憂痛
作哀讚書之於碑愍予小子夙罹孔艱嚴考殞沒我在
韶年母氏鞠育載矜載憐殷斯勤斯慈愛備存匪惟驕
之範我軌度教誨嚴肅昭示好惡俾我克類畏威懼怒
用免咎悔踐繼先祖即爵其土二將是臨與帝剖符守
於濟陰夫人寢疾榮此寵休疾用歡痊翊日斯瘳將征
將邁從養陶丘景命徂逝不愍少留疾太漸以危亟兮
精微微而浸衰逼王職於憲典兮子孫忽以替違目不

臨此氣絕兮手不親夫含飯陳衣衾而不省兮合綆棺
而不見昔予考之即世兮安宅兆於舊邦依存意以奉
亡兮遷靈柩而同來考妣痛以慄兮離乖神柩集而移
兮增哀黃壚窅而無間兮出入聞其無門昇柩在茲兮
不知覓景之所存悼孤衷之不遂兮思情慄以傷肝幽
情淪於后坤兮精哀達乎昊乾

郡掾史張玄祠堂碑銘

掾諱玄字伯雅河南偃師人也其先張仲者實以孝友

為名左右周室大漢初興張蒼為丞相封北平侯其後
自河內遷於茲土世為顯姓掾天姿恭恪宣慈惠和允
恭博敏惻隱仁恕正身履道以協閭庭損用節財以贍
疏族動中規矩言合典式不知名彰不飾行著可謂仁
粹淑貞自然之素者已論者嘉之州郡禮招署致掾史
沉靜寡欲不求榮祿是以豐於天爵薄於人位某月日
遭疾而卒掾孫翻以貞固之質受過庭之訓獲執戟出
宰相邑遷太守得大夫之祿奉烝嘗之祀尋原祚之所

由而至於此先考積善之餘慶陰德之陽報乃於是立
祠堂假碑勒銘式明令德以示乎後辭曰於惟我考允
迪懿德治信斯順其儀不忒仁惠周洽行惟模則篤垂
餘慶貽此燕翼邈矣遺孫用懷多福刊名金石流於周
極

袁滿來碑銘

茂德休行曰袁滿來太尉公之孫司徒公之子逸才淑
姿實天所授聰遠通敏越齔在塾明習易學從誨如流

遇目能成事不再舉問一及三具始知終情性周備夙
有奇節孝智所生順而不驕篤友兄弟和而無忿氣決
泉達無所凝滯雖冠帶之中士校材考行無以加焉允
公族之殊異國家之輔佐衆偉其器士嘉其良雖則童
稚令聞芬芳降生不永年十有五四月壬寅遭疾而卒
既苗而不穗凋殞華英嗚呼悲夫乃假碑旌於墓表嗟
其傷矣惟以告哀

童幼胡根碑銘

故陳畱太守胡君子曰根字仲原生有嘉表幼而克才
角犀豐盈光潤玉顏聰明敏惠好問早識言語所及智
思所生雖成人之德無以加焉稟命不長夙罹凶灾年
七歲建寧二年遭疾夭逝慈母悼痛昆弟孔懷感襁褓
之親愛憐連城之乖離乃權宜就封二祖墓側親屬李
陶等相與追慕先君悲悼遺嗣樹碑刊辭以慰哀思辭
曰於惟仲原應氣淑靈實有令儀而氣如瑩明智之性
與體俱生聞言斯識睹物知名傳者太勤受誨則成柔

和順美與人靡爭忿不怨懟喜不驕盈當受福永為光
為榮如何昊天降此短齡惜繁華之方燿兮望嚴霜而
凋零嗟童孺之天逝兮傷慈母之肝情從皇祖乎靈兆
兮庶神鳧之斯寧哀慘戚以流涕兮念玉質之不呈顧
永懷於不朽兮乃託辭於斯銘

蔡中郎集卷六